

欽定舊五代

四之百卷
十一

舊五代史卷一百十

宋門下侍郎參知政事監修國史薛居正等撰

周書第一

太祖紀一

太祖聖神恭肅文武孝皇帝姓郭氏諱威字文仲邢州
堯山人也或云本常氏之子幼隨母適郭氏故冒其姓

焉

五代會要周
號叔之後

高祖諱瑋廣順初追尊爲睿和皇帝廟

號信祖陵曰溫陵高祖妣張氏追諡睿恭皇后曾祖諱
諶漢贈太保追尊爲明憲皇帝廟號僖祖陵曰齊陵曾
祖妣鄭國夫人申氏追諡明孝皇后祖諱蘊漢贈太傅

追尊爲翼順皇帝廟號義祖陵曰節陵

五代會要溫陵齊陵節陵皆無

陵所遙申朝拜

祖妣陳國夫人韓氏追諡翼敬皇后皇考諱簡

漢贈太師追尊爲章肅皇帝廟號慶祖陵曰欽陵皇妣燕國夫人王氏追諡爲章德皇后后以唐天祐元年甲子歲七月二十八日生帝于堯山之舊宅載誕之夕赤光照室有聲如爐炭之裂星火四迸帝生三歲家徙太原居無何皇考爲燕軍所陷歿于王事帝未及齠齔章德太后蚤世姨母楚國夫人韓氏提攜鞠養及長形神魁壯趨向奇崛愛兵好勇不事田產天祐末潞州節度使李嗣昭常山戰歿子繼韜自稱留後南結梁朝據城

阻命乃散金以募豪傑帝時年十八避吏故關依故人
常氏遂往應募帝負氣用剛好鬪多力繼韜奇之或踰
法犯禁亦多假借焉嘗遊上黨市有市屠壯健衆所畏
憚帝以氣凌之因醉命屠割肉小不如意叱之屠者怒
袒腹謂帝曰爾敢刺我不否帝卽割其腹市人執之屬吏
繼韜惜而逸之其年莊宗平梁繼韜伏誅麾下牙兵配
從馬直帝在籍中時年二十一帝性聰敏喜筆劄及從
軍旅多閱簿書軍志戎政深窮繁肯人皆服其敏嘗省
昭義李瓊瓊方讀閩外春秋卽取視之曰論兵也兄其
教我卽授之深通義理

宋史李瓊傳唐莊宗募勇士卽
應募與周祖等十人約爲兄弟

一日會飲瓊熟視周祖知非常人因舉酒祝曰凡我十人龍蛇混合異日富貴無相忘苟渝此言神降之罰皆刺臂出血爲誓周祖與瓊情好尤密嘗造瓊見其危坐讀書因問所讀何書瓊曰此闕外春秋所謂以正守國以奇用兵較存亡治亂記賢愚成敗皆在此也周祖令讀之謂瓊曰兄當教我自是周祖出入常袖以自隨遇暇輒讀每問難

瓊謂瓊爲師天成初明宗幸浚郊時朱守殷嬰城拒

命帝從晉高祖一軍率先登城晉祖領副侍衛以帝長于書計召置麾下令掌軍籍前後將臣無不倚愛初聖穆皇后嬪于帝帝方匱乏而后多資從

東都事略柴后資周太祖以金

帛使事嘗晝寢有小虺五色出入顴鼻之間后遽見愕

然在太原時有神尼與帝同姓見帝謂李瓊曰我宗天上大仙頂上有肉角當爲世界主清泰末晉起于河東

時河陽節度使張彥琪爲侍衛步軍都指揮使奉命北伐帝從之營于晉祠是時屋壞同處數人俱斃唯帝獨無所傷漢高祖爲侍衛馬步都虞候召置左右所居官舍之鄰吳氏有青衣佳娘者爲山魃所魅鬼能人言而投瓦石鄰伍無敢過吳氏之舍者帝過之其鬼寂然帝去如故如是者再或謂鬼曰爾旣神向者客來又何寂然鬼曰彼大人者繇是軍中異之范延光叛于魏命楊光遠討之帝當行意不願從或謂帝曰楊公當朝重勳子不欲從何也帝曰楊公素無英雄氣得我何用能用我其劉公平漢祖累鎮藩閩皆從之及鎮并門尤深待

遇出入帷幄受腹心之寄帝亦悉心竭力知無不爲及吐渾白可久叛入契丹帝勸漢祖誅白承福等五族得良馬數千匹財貨百萬計以資軍開運末契丹入汴晉帝北遷帝與蘇逢吉楊邠史宏肇等勸漢祖建號以副人望漢高祖卽位晉陽時百度草創四方猶梗經綸締構帝有力焉授權樞密副使檢校司徒漢高祖至汴正授樞密副使檢校太保乾祐元年春漢高祖不豫及大漸與蘇逢吉等同受顧命隱帝嗣位拜樞密使加檢校太尉舊制樞密使未加使相者不宣麻制至是宣之自帝始也

東都事略魏仁浦傳仁浦少爲刀筆吏隸樞密院太祖問以卒乘數仁浦對曰帶甲者六萬太

祖喜曰天下事不足憂也有頃河中李守貞據城反朝廷憂之諸大

臣共議進取之計史宏肇曰守貞河陽一客司耳竟何能爲帝曰守貞雖不習戎行然善接英豪得人死力亦勅敵宜審料之乃命白文珂常思率兵攻取師未至而趙思綰竊據永興王景崇反狀亦露朝廷遣郭從義王峻討趙思綰七月西面師徒大集未果進取其月十三

日制授帝同平章事卽遣西征以安慰招撫爲名詔西

面諸軍並取帝節度時論以白文珂常思非守貞之敵

聞帝西行羣情大愜

宋史李穀傳周祖討河中穀掌轉運時周祖已有人望潛貯異志屢

以諷穀穀但對以人臣當盡節奉上而已

八月六日帝發離京師二十日師

至河中

宋史扈彥珂傳周祖爲樞密使總兵出征時議多以先討景崇思縮爲便周祖意未決彥珂曰

三叛連衡推守貞爲主宜先擊河中河中平則永興鳳翔失勢矣今捨近圖遠若景崇思縮逆戰于前守貞兵其後腹背受敵爲之奈何周祖從其言

命白文珂營于河西帝營于河東

不數日周設長塹復築長連城以迫之帝在軍居常接賓客與大將讌語卽褰衣博帶或遇巡城壘對陳敵幅巾短後與衆無殊臨矢石冒鋒刃必以身先與士伍分甘共苦稍立功效者厚其賜與微有傷痍者親爲循撫士無賢不肖有所陳啓溫顏以接俾盡其情人之過忤未嘗介意故君子小人皆思効用守貞聞之深以爲憂十二月帝以蜀軍屯大散關卽親率牙兵往鳳翔永興

相度將發謂白文珂劉詞曰因獸猶鬪當謹備之帝至
華州聞蜀軍退敗遂還二年正月五日夜李守貞遣將
王三鐵領千餘人夜突河西砦果爲劉詞等力戰敗之
先是軍中禁酒帝有愛將李審犯令斬之以徇五月九
日取河西砦主周光遜以砦及部衆千餘人來降十七
日下令攻城會西北大風揚沙晦冥帝令禱河北祠奠
訖而風止自是晝夜攻之七月十三日帝率三砦將士
奪賊羅城二十一日城陷守貞舉家自焚而死帝前夢
河神告曰七月下旬上帝當滅守貞之族至是收復賊
壘城中人言見帝營上有紫氣如樓閣華蓋之狀

東都
事略

王溥傳周太祖將兵討三叛以溥爲從事三叛旣平朝士及藩鎮嘗以書往來詞意涉于悖逆者太祖籍其名欲按之溥諫曰臆魅伺夜而出日月旣照則氛沴消矣請焚之以安反側太祖從之二年八月五日帝自河中班師其月二十七日入朝漢帝命升階撫勞酌御酒以賜之錫賚優厚翌日漢帝議賞勳欲兼方鎮帝辭之乃止帝以出征時廳子都七十三人具籍獻之九月五日制加檢校太師兼侍中十月契丹入寇前鋒至邢洛貝魏河北告急帝受詔率師赴北邊以宣徽南院使王峻爲監軍其月十九日帝至邢州遣王峻前軍趨鎮定時契丹已退帝大閱欲臨寇境詔止之三年二月班師三月十七日制授鄴都畱守樞密使如故時

漢帝以北兵爲患委帝以河朔之任宰相蘇逢吉等議
藩臣無兼樞密使例史宏肇以帝受任之重苟不兼密
務則難以便宜從事竟從宏肇之議詔河北諸州凡事
一稟帝節度帝將北行啓漢帝曰陛下富有春秋萬幾
之事宜審于聽斷文武大臣乃心王室凡事諮詢卽無
敗失漢帝斂容謝之帝至鄴盡去煩弊之事不數月閭
政有序一方晏然詔書褒美一夕在山亭院齋中忽有
黃氣起于前上際于天帝于黃氣中見星文紫微文昌
爛然在目旣而告之星者曰予于室中見天象不其異
乎對曰坐見天衢物不能隔至貴之祥也異日牙署中

有紫氣起于幡竿龍首凡三日十一月十四日澶州節度使李洪義侍衛步軍都指揮使王殷遣澶州副使陳光穗至鄴都報京師有變是月十三日旦羣小等害史宏肇等前一夕李業等遣心腹賁密詔至澶州令李洪義殺王殷又令護聖左廂都指揮使郭崇等害帝于鄴城十三日洪義受得密詔恐事不濟乃以密詔示王殷殷與洪義卽遣陳光穗馳報于帝十四日帝方與宣徽使王峻坐議邊事忽得洪義文字遽歸牙署峻亦未知其事帝初知楊史諸公被誅神情惘然又見移禍及已伸訴無所卽集三軍將校諭之曰予從微至著輔佐國

家先皇登遐親受顧託與楊史諸公殫歷經謀忘寢與食一旦無狀盡已誅夷今有詔來取予首級爾等宜奉行詔旨斷予首以報天子各圖功業且不累諸君也崇等與諸將校泣于前言曰此事必非聖意卽是左右小人誣罔竊發假令此輩握重柄國得安乎宜得投論以判忠佞何事信單車之使而自棄千載之下空受惡名崇等願從明公入朝面自洗雪除君側之惡共安天下衆然之遂請帝南行帝卽嚴駕首途十六日至澶州王殷迎謁慟哭時隱帝遣小豎驚脫偵鄴軍所在爲游騎所執帝卽遣迴令附奏隱帝赴闕之由仍以密奏置驚

脫衣領中奏曰臣發迹寒賤遭遇聖明既富且貴實過平生之望唯思報國敢有他圖今奉詔命忽令郭崇等殺臣卽時俟死而諸軍不肯行刑逼臣赴關令臣請罪上前仍言致有此事必是陛下左右譖臣耳今驚脫至此天假其便得伸臣心三五日當及闕朝陛下若以臣有欺天之罪臣豈敢惜死若實有譖臣者乞陛下縛送軍前以快三軍之意則臣雖死無恨今託驚脫附奏以聞十七日帝至滑州節度使宋延渥開門迎納帝將發滑臺召將士謂之曰主上爲讒邪所惑誅殺勳臣吾之此來事不獲已然以臣拒君寧論曲直汝等家在京師

不如奉行前詔我以一死謝天子實無所恨將校前啓
曰國家負公公不負國請公速行無遲久安邦雪怨正
在此時旣王峻諭軍曰我得公處分俟平定京城許爾
等旬日剽掠衆皆踊躍十九日隱帝遣左神武統軍袁
羲前鄧州節度使劉重進率禁軍來拒與前開封尹侯
益等屯赤岡是夜俱退二十日隱帝整陣于劉子坡二
十一日兩陣俱列慕容彥超率軍奮擊帝遣何福進王
彥超李筠等大合騎以乘之慕容彥超退却死者百餘
人于是南軍奪氣稍稍奔于北軍慕容彥超與數十騎
東奔兗州吳虔裕張彥超等相繼來見帝是夜侯益焦

繼勳潛至帝營帝慰勞遣還二十二日旦郭允明弒漢
隱帝于北郊初官軍之敗帝謂宋延渥曰爾國親可速
往衛主上兼附奏請陛下得便速奔臣軍免爲左右所
圖及延渥至亂兵雲合卽惶駭而還是旦帝望見天子
旌旗于高坡之上謂隱帝在其下卽免胄釋馬而前左
右慮有不測請帝止帝泣曰吾君在此又何憂焉及至
前隱帝已去矣帝歔歔久之俄聞隱帝遇弒號慟不已
帝至元化門劉銖雨射城外帝迴車自迎春門入諸軍
大掠煙火四發帝止于舊第何福進以部下兵守明德
門翌日王殷郭崇言曰若不止剽掠比夜化爲空城耳

由是諸將部分斬其剽者至晡乃定帝與王峻詣太后宮起居請立嗣君乃以高祖姪徐州節度使贇入繼大統語在漢紀二十七日帝以嗣君未至請太后臨朝會鎮定州馳奏契丹入寇河北諸州告急太后命帝北征十二月一日帝發離京師四日至滑州駐馬數日會湘陰公遣使慰勞諸將受宣之際相顧不拜皆竊言曰我輩陷京師各各負罪若劉氏復立則無種矣或有以其言告帝者帝愕然卽時進途十六日至澶州是日旭日邊有紫氣來當帝之馬首十九日下令諸軍進發二十日諸軍將士大譟趨驛如墻而進帝閉門拒之軍士

登墻越屋而入請帝爲天子亂軍山積登階匝陛扶抱擁迫或有裂黃旗以被帝體以代赭袍山呼震地帝在萬衆之中聲氣沮喪悶絕數四左右親衛星散竄匿帝卽登城樓稍得安息諸軍遂擁帝南行時河水初解浮梁未搆是夜北風凜烈比旦水堅可渡諸軍遂濟衆謂之凌橋濟竟水泮時人異之時湘陰公已駐宋州樞密使王峻在京聞澶州之變遣侍衛馬軍指揮使郭崇率七百騎赴宋州以衛湘陰公二十五日帝至七里店羣臣謁見遂營于臯門村二十七日漢太后令曰樞密使侍中郭威以英武之才兼內外之任剪除禍亂宏濟艱

難功業格天人望冠世今則軍民愛戴朝野推崇宜總
萬幾以允羣議可監國中外庶事並取監國處分二十
八日監國教曰寡人出自軍戎本無德望因緣際會叨
竊寵靈高祖皇帝甫在經綸待之心腹洎登大位尋付
重權當顧命之時受忍死之寄與諸勳舊輔立嗣君旋
屬三叛連衡四郊多壘謬膺朝旨委以專征兼守重藩
俾當勅敵敢不橫身戮力竭節盡心冀肅靜于疆場用
保安于宗社不謂奸邪構亂將相連誅偶脫鋒鏑克平
患難志安劉氏願報漢恩推擇長君以紹丕構遂奏太
后請立徐州相公奉迎已在于道途行李未及于都輦

尋以北面事急寇騎深侵遂領師徒徑往掩襲行次近鎮已渡洪河十二月二十日將登澶州軍情忽變旌旗倒指喊叫連天引袂牽襟迫請爲主環繞而逃避無所紛紜而逼脅愈堅頃刻之間安危莫保事不獲已須至徇從于是馬步諸軍擁至京闕今奉太后詔旨以時運艱危機務難曠俾令監國遜避無由僂俛遵承夙夜憂愧云時文武百官內外將帥藩臣郡守等相繼上表勸進三十日夜御營西北隅步軍將校因醉揚言昨澶州馬軍扶策今步軍亦欲扶策尋令虞候詰其姓名昧且擒而斬之其一軍仍納甲仗遣中使監送就糧所

廣順元年春正月丁卯漢太后詔曰邃古已來受命相
繼是不一姓傳諸百王莫不人心順之則興天命去之
則廢昭然事迹著在典書予否運所丁遭家不造奸邪
搆亂朋黨橫行大臣冤枉以被誅少主倉卒而及禍人
自作孽天道寧論監國威深念漢恩切安劉氏旣平亂
略復正頽綱思固護于基扃擇繼嗣于宗室而獄訟盡
歸于西伯謳謠不在于丹朱六師竭推戴之誠萬國仰
欽明之德鼎革斯契圖籙有歸予作佳賓固以爲幸今
奉符寶授監國可卽皇帝位於戲天祿在躬神器自至
允集天命永綏兆民敬之哉是日帝自臯門入大內御

崇元殿卽皇帝位制曰自古受命之君興邦建統莫不
上符天意下順人心是以夏德旣衰爰啓有商之祚炎
風不競肇開皇魏之基朕早事前朝久居重位受遺輔
政敢忘伊霍之忠仗鉞臨戎復委韓彭之任匪躬盡瘁
焦思勞心討叛渙于河潼張聲援于岐雍竟平大憝粗
立微勞纔旋旆于關西尋統兵于河朔訓齊師旅固護
邊陲只將身許國家不以賊遺君父外憂少息內患俄
生羣小連謀大臣遇害棟梁旣壞社稷將傾朕方在藩
維以遭讒構逃一生于萬死徑赴闕庭梟四罪于九衢
幸安區宇將延漢祚擇立劉宗徵命已行軍情忽變朕

以衆庶所迫逃避無由扶擁至京尊戴爲主重以中外
勸進方岳推崇僂俛雖順于羣心臨御實慙于涼德改
元建號祇率于舊章革故鼎新宜覃于霈澤朕本姬氏
之遠裔號叔之後昆積慶累功格天光表盛德旣延于
百世大命復集于眇躬今建國宜以大周爲號可改漢
乾祐四年爲廣順元年自正月五日昧爽已前應天下
罪人常赦所不原者咸赦除之故樞密使楊邠侍衛都
指揮使史宏肇三司使王章等以勞定國盡節致君千
載逢時一旦同命悲感行路憤結重泉雖尋雪于沈冤
宜更伸于渥澤並可加等追贈備禮歸葬葬事官給仍

訪子孫敘用其餘同遭枉害者亦與追贈馬步諸軍將士等戮力叶誠輸忠効義先則平持內難後乃推戴朕躬言念勤勞所宜旌賞其原屬將士等各與等第超加恩命仍賜功臣名號已帶功臣者別與改賜應左降官未量移者與量移已量移者與復資已復資者量加敘錄亡官失爵之人宜與齒用配流徒役人並許放還諸處有犯罪逃亡之人及山林草寇等一切不問如赦到後一月不歸本業者復罪如初內外前任見任文武官寮致仕官各與加恩應在朝文武臣寮內諸司使諸道行軍副使藩方馬步都指揮使如父母在未有恩澤者

卽與恩澤已有者更與恩澤如亡沒未曾追封贈者亦與封贈已封贈者更與封贈應天下州縣所欠乾祐元年二年已前夏秋殘稅及沿徵物色并三年夏稅諸色殘欠並與除放澶州已來官路兩邊共二十里內并乾祐三年殘稅欠稅並與除放應河北沿邊州縣自去年九月後來曾經契丹蹂踐處其人戶應欠乾祐三年終已前積年殘欠諸色稅物並與除放應係三司主持錢穀敗闕場院官取乾祐元年終已前徵納外灼然無抵當者委三司分析聞奏天下倉場庫務宜令節度使專切鈐轄掌納官吏一依省條指揮不得別納斛餘秤耗

舊來所進羨餘物色今後一切停罷應乘輿服御之物不得過爲華飾宮闈器用務從樸素大官常膳一切減損諸道所有進奉以助軍國之費其珍巧纖華及奇禽異獸鷹犬之類不得輒有獻貢諸無用之物不急之務並宜停罷帝王之道德化爲先崇飾虛名朕所不取苟致治之未洽雖多端以奚爲今後諸道所有祥瑞不得輒有奏獻古者用刑本期止辟今茲作法義切禁非蓋承弊之時非猛則奸兇難制及知勸之後在寬則典憲得宜相時而行庶臻中道今後應犯竊盜賊贓及和姦者並依晉天福元年已前條制施行應諸犯罪人等除

反逆罪外其罪並不得籍沒家產誅及骨肉一依格令處分天下諸侯皆有親戚自可慎擇委任必當克効參裨朝廷選差理或未當宜矯前失庶叶通規其先于在京諸司差軍將充諸州郡元從都押衙孔目官內知客等並可停廢仍勒却還舊處職役近代帝王陵寢合禁樵採唐莊宗明宗晉高祖各置守陵十戶以近陵人戶充漢高祖皇帝陵署職員及守官人時日薦饗並守陵人戶等一切如故仍以晉漢之冑爲二王後委中書門下處分云司天上言今國家建號以木德代水準經法國以姓墓爲臘請以未日爲臘從之時議者曰昔武王

勝殷歲集于房國家受命金木集于房文王厄羨里而
卦遇明夷帝脫于鄴大衍之數復得明夷則周爲國號
符于文武矣先是丁未年夏六月土金木火四星聚于
張占者云當有帝王興于周者故漢祖建國由平陽陝
服趨洛陽以應之及隱帝將嗣位封周王以符其事而
帝以姬號之胄復繼宗周而天人之契炳然矣昔武王
以木德王天下宇文周亦承木德而三朝皆以木代水
不其異乎戊辰前曹州防禦使何福進受宣權許州節
度使前復州防禦使王彥超受宣權徐州節度使前瀘

尊號曰昭聖皇太后是日詔有司擇日爲故主發哀

五代

會要載原敕云漢高祖爲義帝發喪魏明帝正禪陵尊號一時達禮千古所稱況朕久事前朝常參大政雖遷虞事夏見奪于羣情而四海九州咸知予夙志宜令所司擇日爲故主舉哀仍備山陵葬禮 辛未有

司上言皇帝爲故主舉哀日服縞素直領深衣腰經等成服畢祭奠不視朝七日坊市禁音樂文武內外臣寮成服後每日赴太平宮臨三日止七日釋服至山陵啓

攢塗日服初服輜車出城班辭釋服從之壬申前博州刺史李筠受宣權滑州節度使癸酉樞密使檢校太傅王峻加同平章事以前澶州節度使李洪義爲宋州節度使加同平章事以滑州節度副使陳觀爲左散騎常

侍鄴都留守判官王溥爲左諫議大夫並充樞密院直
學士以元從都押衙鄭仁誨爲客省使知客押牙向訓
爲宮苑使北京留守劉崇遣押牙鞏廷美致書求劉贊
歸藩帝報曰朕在澶州之時軍情推戴之際先差來直
省李光美備見必想具言而況遐邇所聞在後盡當知
悉湘陰公比在宋州駐泊見令般取赴京但勿憂疑必
令得所惟公在彼固請安心若能同力扶持別無顧慮
卽當便封王爵永鎮北門鐵契丹書必無愛惜其諸情
素並令來人口宣遣千牛衛將軍朱憲充入契丹使先
是去年契丹永康王烏裕寇邢趙陷內邱及迴烏裕遣

使與漢隱帝書

通鑑契丹之攻內邱也死傷頗多又值月食軍中多妖異契丹主不敢深入引

兵還遣使請和于漢

使至境上會朝廷有蕭牆之變帝定京城週

至澶州遇蕃使至遂與入朝至是遣朱憲伴送來使歸

蕃兼致書敘革命之由仍以金酒器一副玉帶一遺烏

裕晉州節度使王晏殺行軍司馬徐建以通河東聞乙

亥鄆州節度使守太師兼中書令齊王高行周進位尚

書令襄州節度使檢校太師守太傅兼中書令齊國公

安審琦進封南陽王青州節度使檢校太師守太保兼

中書令魏國公符彥卿進封淮陽王夔州節度使侍衛

親軍馬步軍都指揮使檢校太傅王殷加同平章事充

鄴都留守典軍如故丙子帝赴太平宮爲漢隱帝發喪
百官陪位如儀是日湘陰公元從右都押衙鞏廷美教

練使楊溫等據徐州以拒命帝遣新授節度使王彥超

率兵馳赴之仍賜廷美等勅書

通鑑帝復遣劉贊書曰爰念斯人盡心于主足

以賞其忠義何由責以悔尤俟新節度入城當各除刺史公可更以委曲示之

丁丑荆南高保

融奏去年十一月朗州節度使馬希萼破潭州十二月

十八日縊殺馬希廣至十九日希萼自稱天策上將軍

武平靜江寧遠等軍節度使嗣楚王戊寅湘陰公殂已

卯以前太師齊國公馮道爲中書令宏文館太學士以

司徒兼門下侍郎同平章事宏文館大學士竇貞固爲

侍中兼修國史以左僕射平章事集賢殿大學士蘇禹珪爲守司空平章事夏州節度使李彝興進封隴西郡王荆南高保融進封渤海郡王靈武馮暉進封陳留郡王西京白文珂兗州慕容彥超鳳翔趙暉並加兼中書令詔王彥超率兵攻徐州庚辰故樞密使左僕射平章事楊邠追封恒農郡王故宋州節度使兼侍衛親軍都指揮使史宏肇追封鄭王故三司使檢校太尉平章事王章追封瑯琊郡王是日詔曰朕以眇末之身託于王公之上懼德弗類撫躬靡遑豈可化未及人而過自奉養道未方古而不知節量與其耗費以勞人曷若儉約

而克已昨者所頒赦令已述至懷官闈服御之所須悉
從減損珍巧纖奇之厥貢並使寢停尙有未該再宜條
舉應天下州府舊貢滋味食饌之物所宜除減其兩浙
進細酒海味薑瓜湖南枕子茶乳糖白沙糖橄欖子鎮
州高公米水梨易定栗子河東白社梨米粉菜豆粉玉
屑粳子麵永興御田紅秈米新大麥麩興平蘇栗子華
州麝香羚羊角熊膽獺肝朱柿熊白河中樹紅棗五味
子輕錫同州石鏃餅晉絳蒲萄黃消梨陝府鳳栖梨襄
州紫薑新筍橘子安州折粳米糟味青州水梨河陽諸
雜果子許州御李子鄭州新筍鵝梨懷州寒食杏仁申

州襄荷亳州草薺沿淮州郡淮白魚如聞此等之物雖
皆出于土產亦有取于民家未免勞煩率皆糜費加之
力役負荷馳驅道途積于有司之中甚爲無用之物今
後並不須進奉諸州府更有舊例所進食味其未該者
宜奏取進止又詔在朝文武臣僚各上封事凡有益國

利民之事速具以聞

通鑑詔曰朕生長軍旅不親學問
未知治天下之道文武官有益國

利民之術各具封事以聞
咸宜直書其事勿事辭藻

辛巳鎮州武行德晉州王晏

相州張彥成潞州常思邠州侯章並加兼侍中以侍衛
馬軍都指揮使果州防禦使檢校太保郭崇爲洋州節
度使檢校太傅典軍如故以待衛步軍都指揮使岳州

防禦使曹英爲利州節度使檢校太傅典軍如故癸未
涇州史懿延州高允權滄州王景永興郭從義定州孫
方簡並加兼侍中鄜州楊信同州薛懷讓貝州王繼宏
並加同平章事乙酉華州王饒河中扈彥珂鄧州折從
阮邢州劉詞並加同平章事丙戌幸西莊潞州奏得石
會關使王延美報河東劉崇于正月十六日僭號丁亥
以前澶州節度使李洪義爲宋州節度使加同平章事
以曹州防禦使北面行營馬步都排陣使何福進爲許
州節度使加檢校太傅以博州刺史北面行營右廂排
陣使李筠爲滑州節度使加檢校太保戊子有司上言

準赦書以晉漢之曹爲二王後其唐五廟仲祀合廢從
之庚寅宗正寺奏請以晉漢故事遷漢七廟神主入昇
平宮行仲享之禮以漢宗子爲三獻從之

舊五代史卷一百十

舊五代史卷一百十攷證

周太祖紀一八月六日帝發離京師二十日師至河中
案五代春秋作七月郭威率師圍河中據此紀則
周太祖以八月六日始發京師非七月卽圍河中也
是書漢隱帝紀與此紀互異攷證見漢紀

城陷守貞舉家自焚而死 案歐陽史周本紀云守貞

與妻子自焚死思綰景崇相次降令攷是書漢紀五
月乙丑趙思綰乞降七月甲子郭威奏收復河中守
貞自燔死是思綰之降在守貞自焚之前也又云三
年正月趙暉奏收復鳳翔王景崇自燔死是景崇未

嘗降也歐陽史漢本紀亦先載趙思縉降後書克河中王景崇傳亦作景崇自燔死紀傳前後自相矛盾當以是書爲得其實

戊寅湘陰公殂 案歐陽史作十二月王峻遣郭崇以騎兵七百逆劉贇于宋州殺之通鑑作正月戊寅殺湘陰公于宋州

烏裕舊作兀欲今改

舊五代史卷一百十一

宋門下侍郎參知政事監修國史薛居正等撰

周書第二

太祖紀二

廣順元年春二月癸巳朔以樞密副使尚書戶部侍郎
范質爲兵部侍郎依前充職以陳州刺史判三司李穀
爲戶部侍郎判三司以右金吾大將軍充街使翟光鄴
爲左千牛衛上將軍充宣徽北院使以宣徽北院使袁
義爲左武衛上將軍充宣徽南院使以左右金吾大將
軍充街使符彥琳爲右監門上將軍丁酉以皇子天雄

軍牙內都指揮使檢校右僕射貴州刺史榮起復爲澶
州節度使檢校太保以右金吾上將軍薛可言爲右龍
武統軍以左神武統軍安審約爲左羽林統軍以左驍
衛上將軍趙贊爲右羽林統軍以太子太師致仕宋彥
筠爲左衛上將軍詔移生吐渾族帳于潞州長子縣江
豬嶺己亥以左武衛上將軍劉遂凝爲左神武統軍以
左衛上將軍焦繼勳爲右神武統軍以左領衛上將軍
史佺爲右衛上將軍庚子故吳國夫人張氏追贈貴妃
故皇第三女追封樂安公主故第二子青哥贈太保賜
名侗第三子意哥贈司空賜名信故長婦劉氏追封彭

城郡夫人皇姪三人守筠贈左領軍將軍改名愿奉超
贈左監門將軍定哥贈左千牛衛將軍賜名遜故皇孫
三人宜哥贈左驍衛大將軍賜名誼喜哥贈武衛大將
軍賜名誠三哥贈左領衛大將軍賜名誠辛丑西州回
鶻遣使貢方物前開封尹魯國公侯益進封楚國公前
西京留守莒國公李從敏進封秦國公前西京留守王
守恩進封莒國公癸卯以前中書侍郎兼戶部尚書平
章事李濤爲太子賓客詔宣徽南院使袁義權知開封
府事以太子太保和凝爲太子太傅丙午晉州王晏奏
河東劉崇遣僞招討使劉鈞副招討使白截海率步騎

萬餘人來攻州城以今月五日五道齊攻率州兵拒之

賊軍傷死甚衆

宋史王晏傳劉崇侵晉州晏閉關不出設伏城上并人以爲怯競攀堞而登晏

麾伏兵擊之顛死者甚衆遂焚橋遁晏遣子漢倫追北數十里斬首百餘級

內出寶玉器及

金銀結縷寶裝牀几飲食之具數十碎之于殿庭帝謂

侍臣曰凡爲帝王安用此仍詔所司凡珍華悅目之物

不得入宮先是回鶻間歲入貢禁民不得與蕃人市易

寶貨至是一聽私便交易官不禁詰丁未左千牛將軍

朱憲使契丹迴契丹主烏裕遣使郭濟獻良馬一駒賀

登極戊申詔曰朕祇膺景命奄有中區每思順物之情

從衆之欲將使照臨之下多寄食儻舍之徒歲月之間

動懷土念家之思宜循大體用革前規應諸道州府有
前資朝官居住如未赴京不得發遣其行軍副使已下
幕職州縣官等得替求官自有月限年月未滿一聽外
居如非時詔徵不在此限已酉有司議立四親廟從之
辛亥以太子少傅楊凝式爲太子少師以太常卿張昭
爲戶部尙書以尙書左丞王易爲禮部尙書以兵部侍
郎邊蔚爲太常卿以翰林學士中書舍人魚崇諒爲工
部侍郎充職以戶部侍郎韋勳爲兵部侍郎以刑部侍
郎邊歸讜爲戶部侍郎以禮部侍郎司徒詡爲刑部侍
郎以祕書監趙上交爲禮部侍郎以兵部尙書王仁裕

爲太子少保以翰林學士禮部尙書張沆爲刑部尙書
充職以尙書右丞田敏爲左丞以吏部侍郎段希堯爲
工部尙書以太子詹事馬裔孫爲太子賓客前鄜州節
度使劉重進前滑州節度使宋延渥並加食邑吐渾府
留後王全德加檢校太保充憲州刺史隰州刺史許遷
奏河東賊軍劉筠自晉州引兵來攻州城尋以州兵拒
之賊軍傷死者五百人信宿遁去丁巳以尙書左丞田
敏充契丹國信使回鶻遣使貢方物己未天德軍節度
使虢國公郭勳加同平章事前宗正卿劉皞爲衛尉卿
辛酉以衛尉卿邊光範爲祕書監以前吏部侍郎李詳

爲吏部侍郎以前戶部侍郎顏衍爲尙書右丞三月壬戌朔前西京留守李從敏卒戊辰以前左武衛上將軍李懷忠爲太子太傅致仕以前邢州節度使安審暉爲太子太師致仕辛未幸南莊壬申詔曰諸州府先差散從親事官等前朝創置蓋出權宜苟便一時本非舊貫近者遍詢羣議兼採封章且言前件抽差于理不甚允當一則礙州縣之色役一則妨春夏之耕耘貧乏者困于供須豪富者幸于影庇旣爲煩擾須至改更況當東作之時宜罷不急之務其諸州所差散從親事官等並宜放散詔下公私便之徐州行營都部署王彥超馳奏

收復徐州詔曰逆首楊溫及親近徒黨並處斬其餘無
名目人及本城軍都將校職掌吏民等雖被脅從本非
同惡並釋放兼知自前楊溫招喚草賊同力守把朕以
村墅小民偶被扇誘念其庸賤特與含容其招入城草
賊並放歸農仍倍加安撫湘陰公夫人並骨肉在彼仰
差人安撫守護勿令驚恐以右散騎常侍張煦給事中
王延藹並爲左散騎常侍以前大名府少尹李瓊爲將
作監以前彰武軍節度使周密爲太子太師致仕以衛
尉卿劉皞充漢隱帝山陵都部署丙子以太子少保致
仕王延爲太子少傅以戶部尚書致仕盧損左驍衛上

將軍致仕李肅並爲太子少保兵部尚書致仕韓昭允
爲尚書右僕射太子太師致仕盧文紀爲司空自延而
下並依前致仕故散騎常侍裴羽贈戶部尚書故太子
賓客蕭愿贈禮部尚書以司農卿致仕薛仁謙爲鴻臚
卿以將作監致仕烏昭爲太府卿以太常少卿致仕王
禧爲少府監以秘書少監致仕段顯爲將作監自仁謙
而下並依前致仕詔沿淮州縣軍鎮今後自守疆土不
得縱一人一騎擅入淮南地分已卯潞州奏涉縣所擒
河東將士二百餘人部送赴闕詔給衫袴巾履放歸本
土甲申鎮州武行德移鎮許州何福進移鎮鎮州丙戌

以襄州節度副使郭令圖爲宗正卿詔曰故蘇逢吉劉
銖頃在漢朝與朕同事朕自平禍亂不念仇讐尋示優
宏與全家屬尙以幼稚無託衣食是艱將行矜卹之恩
俾獲生存之路報怨以德非我負人賜逢吉骨肉洛京
莊宅各一賜劉銖骨肉陝州莊宅各一己丑幸南莊庚
寅唐故郇國公李從益追封許王唐明宗淑妃王氏追
贈賢妃辛卯詔諸道節度副使行軍司馬兩京少尹留
守判官並許差定當直人力不得過十五人諸府少尹
書記支使防禦團練副使不得過十人節度推官防禦
團練軍事判官不得過七人逐處係帳收管此外如敢

額外影占人戶其本官當行朝典先是漢隱帝時有人
上言州府從事令錄皆請料錢自合雇人驅使不合差
遣百姓丁戶秉政者然之乃下詔州府從事令錄本處
先差職役並放歸農自是官吏有獨行趨府縣者帝頗
知之故有是命夏四月壬辰朔詔沿淮州縣許淮南人
就淮北糴易餼糧時淮南饑故也甲午以夫人董氏爲
德妃仍令所司備禮冊命己亥改侍衛馬步軍軍額馬
軍舊稱護聖今改爲龍捷步軍舊稱奉國今改爲虎捷
壬寅詔唐莊宗明宗晉高祖三處陵寢各有守陵宮人
並放逐便如願在陵所者依舊供給甲辰相州張彥成

移鎮鄧州折從阮移鎮滑州李筠移鎮相州丙午亳州
防禦使王重允卒戊申幸南莊庚戌皇第四女封壽安
公主辛亥故許州節度使劉信追封蔡王丙辰詔曰牧
守之任委遇非輕分憂之務既同制祿之數宜等自前
有富庶之郡請給則優或邊遠之州俸料素薄以至遷
除之際擬議亦難既論資敘之高低又患祿秩之升降
所宜分多益寡均利同恩冀無黨無偏以勸勳效今定
諸防禦使料錢二百貫祿粟一百石食鹽五石馬十匹
草粟元隨三十人衣糧團練使一百五十貫祿粟七十
石鹽五石馬十匹元隨三十人刺史一百貫祿粟五十

石鹽五石馬五匹元隨二十人云丁巳尙書左丞田敏
使契丹迴契丹主烏裕遣使努瑚報命并獻碧玉金塗
銀裹鞍勒各一副弓矢器仗貂裘等土產馬三十四土
產漢馬十匹庚申帝爲故貴妃張氏舉哀于舊宮輟視
朝三日辛酉司空致仕盧文紀卒五月壬戌朔帝不視
朝以漢隱帝梓宮在殯故也戊寅皇子澶州節度使榮
起復依前澶州節度使以故貴妃張氏去歲薨至是發
哀故也已己遣左金吾衛將軍姚漢英前右神武將軍
華光齋使于契丹辛未太常卿邊蔚上追尊四廟諡議
是夜有大星如五升器流于東北有聲如雷丙子太常

卿邊蔚上太廟四室奠獻舞名丁丑詔京兆鳳翔府應
諸色犯事人第宅莊園店磴已經籍沒者並給付罪人
骨肉壬午幸南莊甲申考城縣巡檢供奉官馬彥勅棄
市坐匿赦書殺獄囚也丙戌宰臣馮道爲四廟冊禮使
六月辛卯朔不視朝以漢隱帝梓宮在殯故也甲午百
寮上表請以七月二十八日皇帝降聖日爲永壽節從
之邢州大雨霖已亥太常少卿劉悅上漢少帝諡曰隱
皇帝陵曰穎陵從之辛亥以樞密使王峻爲尙書左僕
射兼門下侍郎同平章事監修國史充樞密使以樞密
副使尙書兵部侍郎范質爲中書侍郎同平章事充集

賢殿大學士以戶部侍郎判三司李穀爲中書侍郎同
平章事判三司司徒兼侍中監修國史竇貞固司空兼
中書侍郎同平章事集賢殿大學士蘇禹珪並罷相守
本官壬子幸西莊癸丑詔宰臣范質參知樞密院事鄴
都洛滄貝等州大雨霖丙辰西京奏新授宗正卿郭令
圖卒丁巳以尙書左丞顏衍爲兵部侍郎充端明殿學
士以宣徽北院使翟光鄴兼樞密副使秋七月辛酉朔
帝被袞冕御崇元殿授太廟四室寶冊于中書令馮道
等赴西京行禮癸亥尙書左丞田敏兼判國子監事戊
辰以御史中丞于德辰爲尙書右丞以祕書監邊光範

爲太子賓客以戶部尚書張昭爲太子賓客以其子秉爲陽翟簿犯法抵罪昭詣閣待罪詔釋之乃左授此官壬申史官賈緯等以所撰晉高祖實錄三十卷少帝實錄二十卷上之丙子幸宰臣王峻第己丑鎮州奏破河東賊軍于平山縣西斬首五百級是日太常卿邊蔚奏議改郊廟舞名事具樂志八月辛卯漢隱帝梓宮發引帝詣太平宮臨奠詔羣臣出祖于西郊是歲幽州饑流人散入滄州界詔流人至者口給斗粟仍給無主土田令取便種蒔放免差稅癸巳虎入西京修行寺傷人市民殺之乙未幸班荆館壬寅契丹遣幽州牙將曹繼筠

來歸故晉中書令趙瑩之喪詔贈太傅仍賜其子絹五百匹以備喪事歸葬于華陰故里乙巳幸西莊壬子晉州王晏移鎮徐州滄州王景移鎮河中定州孫方簡移鎮華州永興郭從義移鎮許州貝州王繼宏移鎮河陽李暉移鎮滄州以許州節度使武行德爲西京畱守滑州折從阮移鎮陝州河中扈彥珂移鎮滑州陝州李洪信移鎮永興華州王饒移鎮貝州徐州王彥超移鎮晉州丙辰尙食李氏等宮官八人竝封縣君司記劉氏等六人竝封郡夫人尙宮皇甫氏等三人竝封國夫人唐制有內官宮官各有司存更不加郡國之號近代加之

非舊典也以易州刺史孫行友爲定州畱後戊午故夫
人柴氏追立爲皇后仍令所司定諡備禮冊命九月庚
申朔帝詣太平宮起居漢太后辛酉故夫人楊氏追贈
淑妃仍令所司擇日備禮冊命故皇第五女追封永寧
公主癸亥定州奏契丹永康王烏裕爲部下所殺以前
耀州團練使武廷翰太子少保致仕丙子諸道兵馬都
元帥兩浙節度使檢校太師尙書令中書令吳越國王
錢俶加天下兵馬都元帥丁丑中書舍人劉濤責授少
府少監分司西京坐遣男頊代草制詞也監察御史劉
頊責授復州司戶坐代父草制也中書舍人楊昭儉解

官放逐私便以多在假告不親其職也

舊五代史卷一百十一

舊五代史卷一百十一攷證

周太祖紀二相州張彥成 張彥成原本作彥威今據

列傳改正

丙子幸宰臣王峻第 案丙子歐陽史作戊寅

癸亥定州奏契丹永康王烏裕爲部下所殺 案遼史

世宗以九月癸亥遇弒不應定州卽能于癸亥入奏

疑原文有舛誤

烏裕舊作兀欲今改 郭濟舊作骨支今改 努瑚舊

作壽姑今改

舊五代史卷一百十一攷證

舊五代史卷一百十二

宋門下侍郎參知政事監修國史薛居正等撰

周書第三

太祖紀三

廣順元年冬十月己丑朔宰臣王峻獻唐張蘊古大寶箴謝優惟皇誠德賦二圖詔報曰朕生長軍戎勤勞南北雖用心于鈐匱且無暇于詩書世務時艱粗經閱歷前言往行未甚討尋卿有佐命立國之勳居代天調鼎之任恒慮眇德未及古人于是采掇箴規弼諧寡昧披文閱理懌意怡神究爲君治國之源審修已御人之要

帝王之道盡在于茲辭翰俱高珠寶何貴再三省覽深
用愧嘉其所進圖已令于行坐處張懸所冀出入看讀
用爲鑒戒壬辰潞州奏巡檢使陳思讓監軍向訓破河
東賊軍于虜亭癸巳以刑部侍郎司徒詡爲戶部侍郎
以左散騎常侍張煦爲刑部侍郎以給事中呂咸休爲
左散騎常侍甲午絳州防禦使孫漢英卒辛丑荆南奏
湖南亂大將軍陸孟俊執僞節度使馬希萼遷于衡州
立希萼弟希崇爲留後將吏二千餘人遇害者半牙署
庫藏焚燒殆盡乙巳詔併吏部三銓爲一銓委本司長
官通判丙午晉州巡檢王萬敢奏河東劉崇入寇營于

州北辛亥潞州奏河東賊軍寇境乙卯荆南奏淮南遣
鄂州節度使劉仁贍以戰船二百艘于今月二十五日
入岳州丙辰詔樞密使王峻率兵援晉州丁巳以左衛
將軍申師厚爲河西軍節度使檢校太保師厚素與王
峻善及峻貴師厚羈旅無依日于峻馬前望塵而拜會
西涼請帥帝令擇之無欲去者峻乃以師厚奏之師厚
亦欣然求往尋自前鎮將授左衛將軍檢校工部尙書
翼日乃有涼州之命賜旌節駝馬繒帛以遣之十一月
己未朔荆南奏淮南大將邊鎬率兵三萬自袁州路趨
潭州馬希崇遣從事送牌印納器仗鎬入城稱武安軍

節度使馬氏諸族及將吏千餘人皆徙于金陵甲子夜東南白虹亘天以新晉州節度使王彥超爲晉絳行營馬軍都虞候乙丑命王峻出征晉州帝幸西莊以餞之甲戌日南至羣臣拜表稱賀甲申葬故貴妃張氏丁亥詔唐朝五廟舊在至德宮安置應屬徵陵莊田園舍宜令新除右監門將軍李重玉爲主其緣陵緣廟法物除合留外所有金銀器物充遷葬故淑妃王氏及許王從益外其餘竝給與重玉及尼惠英惠燈惠能惠嚴等令重玉以時祀陵廟務在豐潔重玉故皇城使李從璨之子明宗之孫惠英等亦明宗親屬也故帝授重玉官秩

令主先祀卹王者之後也十二月戊子朔詔以劉崇入寇取當月三日暫幸西京庚寅詔巡幸宜停時王峻駐軍陝府聞帝西巡遣使馳奏不勞車駕順動帝乃止乙未幸西莊兗州慕容彥超上言乞朝覲詔允之尋稱部內草寇起不敢離鎮戊申鄆州奏慕容彥超據城反已

酉王峻奏劉崇逃遁王師已入晉州

宋史陳思讓傳王峻援晉州以思讓

與康延昭分爲左右廂排陣使令率軍自烏嶺路至絳州與大軍合崇燒營遁去思讓又與藥元福襲破之

廣順二年春正月戊午朔不受朝賀以宿兵在外故也

庚申王峻奏起近鎮丁夫二萬城晉州壬戌修東京羅城凡役丁夫五萬五千兩旬而罷甲子以侍衛步軍都

指揮使曹英爲兗州行營都部署以齊州防禦使史延
韜爲副都署以皇城使向訓爲兵馬都監陳州防禦使

藥元福爲馬步都虞候率兵討慕容彥超

隆平集慕容彥超盜據兗

海周祖命曹英爲帥向訓副之參用藥元福以兵從謂元福曰已勅英訓勿以軍禮見汝及元福至英訓皆父事諸軍入兗州界不得下路停止村舍犯者以軍法從

事丙寅徐州巡檢供給官張令彬奏破淮賊于沭陽斬
首千餘級擒賊將燕敬權時慕容彥超求援于淮南淮
南僞主李景發兵援之師于下邳聞官軍至退趨沭陽
遂破之庚午高麗權知國事王昭遣使貢方物壬申鎮
州何福進差人部送先擒獲到河東賊軍二百餘人至

闕下詔給巾履衫袴以釋之戊寅徐州部送沭陽所獲賊將燕敬權等四人至闕下詔賜衣服金帛放歸本土敬權等感泣謝罪帝召見謂之曰夫惡兇邪獎忠順天下一也我之賊臣撓亂國法嬰城作逆殃及生靈不意吳人助茲凶惡非良算也爾當歸言之于爾君初漢末遣三司軍將路昌祚于湖南市茶屬淮南將邊錡陷長沙昌祚被賊送金陵及敬權自大朝歸具以帝言告于李景景乃召昌祚延坐從容久之且稱美大朝皇帝聖德廣被恩沾鄰土深有依附國家之意及罷遣僞宰相宋齊邱宴昌祚于別館又令訪昌祚在湖南遭變之時

亡失綱運之數命依數償之給茗菴萬人千斤遣水運
至江夏仍厚給行裝遣之歸闕二月庚寅府州防禦使
折德辰奏河東賊軍寇境率州兵破之斬首二千級辛
卯太白經天癸巳以權知高麗國事王昭爲高麗國王
庚子府州防禦使折德辰奏收河東界岢嵐軍癸卯詔
先獲河東鄉軍一百餘人各給錢鞋放歸鄉里壬子太
子太師致仕安審暉卒三月庚申幸南莊令從臣習射
戊辰以樞密院直學士左諫議大夫王溥爲中書舍人
充翰林學士以內客省使恩州團練使鄭仁誨爲樞密
副使詔宣徽北院使翟光鄴權知永興軍府事甲戌回

鶻遣使貢方物庚辰詔西京莊宅司內侍省宮苑司內
園等四司所管諸巡係稅戶二千五百竝還府縣其廣
德昇平二官竝停廢應行從諸莊園林亭殿房舍什物
課利宜令逐司依舊收管夏四月丙戌朔日有食之帝
避正殿百官守司丁亥詔停蔡州鄉軍戊子以京師旱
分命羣臣禱雨癸巳制削奪慕容彥超在身官爵甲午
高麗國冊使衛尉卿劉暉卒乙卯詔取來月五日車駕
赴兗州城下慰勞將士以樞密副使鄭仁誨爲右衛大
將軍依前充職兼權大內都點檢以中書侍郎平章事
判三司李穀爲權東京留守兼判開封府事五月丙辰

朔帝御崇元殿受朝仗衛如儀庚申車駕發京師戊辰
至兗州城下乙亥收復兗州斬慕容彥超夷其族詔端
明殿學士顏衍權知兗州軍州事壬午曲赦兗州管內
罪人取五月二十七日已前所犯罪大辟已下咸赦除
之慕容彥超徒黨有逃避潛竄者及城內將吏等竝放
罪自慕容彥超違背已來鄉州內有接便爲非者一切
不問諸軍將士歿于王事者各與賻贈都頭已上與贈
官兗州城內及官軍下寨四面去州三里內今年所徵
夏秋稅及沿徵錢物竝放十里內只放一州管界今夏
苗子三分放一分城內百姓遭毀拆舍屋及遭燒焚者

給賜材木諸處差到人夫內有遭矢石死者各給絹三匹仍放戶下三年徭役云癸未詔兗州降爲防禦州仍爲望州六月乙酉朔帝幸曲阜縣謁孔子祠旣奠將致拜左右曰仲尼人臣也無致拜帝曰文宣王百代帝王師也得無敬乎卽拜奠于祠前其所奠酒器銀鑪竝留于祠所遂幸孔林拜孔子墓帝謂近臣曰仲尼亞聖之後今有何人對曰前曲阜令龔文宣公孔仁玉是仲尼四十三代孫有鄉貢三禮顏涉是顏淵之後卽召見仁玉賜緋口授曲阜令顏涉授主簿便令視事仍勅兗州修葺孔子祠宇墓側禁樵採丙戌車駕還京初帝以五

月十三日至兗州賊尙拒守至十七日晝夢道士一人

進書卷首云車駕來月二日還京其下文字絕多不能

盡記既寤以夢告宰臣又四日而城拔帝至軍凡駐蹕

九日而賊平果以六月二日發離城下近代親征克捷

無如此之速也是日大雨城下行官水深數尺其日晚

至中都縣帝笑謂侍臣曰今日若不離城下則當爲潦

所溺矣戊戌車駕至自兗州辛丑以靈武節度使馮暉

卒輟視朝一日壬寅前翰林學士李澣自契丹中上表

陳奏機事且言僞幽州節度使蕭海貞欲謀嚮化帝甚

嘉之

宋史李澣傳海貞與澣相善澣乘間諷海貞以南
歸之計海貞納之周廣順二年澣因定州孫方諫

密表言契丹衰微之勢周祖嘉焉遣諫者田重霸賈詔
慰撫仍命澣通信澣復表述契丹主幼弱多寵好擊鞠
大臣離貳若出師討伐因與通好乃
其時也屬中原多故不能用其言 癸卯德妃董氏薨

乙巳詔宣徽南院使袁義判開封府事辛亥以朔方軍

衙內都虞候馮繼業起復爲朔方軍兵馬留後甲寅幸

舊宅爲德妃舉哀故也秋七月丙辰詔內外臣僚每遇

永壽節舊設齋供今後中書門下與文武百官共設一

齋侍衛親軍都指揮使已下共設一齋樞密使內諸司

使已下共設一齋其餘前任職員及諸司職掌更不得

開設道場及設齋是日大風雨破屋拔樹尙書省都堂

有龍穿屋壞獸角而去西壁有爪迹存焉襄州大水丁

卯詔復升陳州曹州爲節鎮以侍衛馬軍都指揮使洋州節度使郭崇爲陳州節度使以侍衛步軍都指揮使曹英爲曹州節度使竝典軍如故以陳州防禦使藥元福爲晉州節度使辛未詔相州節度使李筠權知潞州軍州事丙子以小底都指揮使漢州刺史李重進爲大內都點檢兼馬步都軍頭領恩州團練使以內殿直都知駙馬都尉張永德領和州刺史充小底第一軍都指揮使八月甲申朔翰林學士刑部尙書張沆落職守本官以中書舍人史館修撰判館事徐台符爲禮部尙書充翰林學士承旨以兵部侍郎韋勳爲尙書右丞以尙

書右丞于德辰爲吏部侍郎以戶部侍郎邊歸譙爲兵部侍郎以禮部侍郎趙上交爲戶部侍郎以樞密直學士左散騎常侍陳觀爲工部侍郎依前充職以刑部侍郎景範爲左司郎中充樞密直學士乙酉樞密使王峻上章請解樞衡凡三上章詔不允庚寅潁州奏先于淮南俘獲孳畜已準詔送還本土甲午詔止絕吏民詣闕舉請刺史縣令賜宰臣李穀白藤肩輿時穀以今年七月因步履傷臂請告數旬詔穀扶持三司刻名印署事仍放朝參庚子潞州節度使常思移鎮宋州相州節度使李筠移鎮潞州壬寅鄆州節度使高行周薨癸丑詔

改鹽麴法鹽麴犯五斤已上處死煎鹽者犯一斤已上處死先是漢法不計斤兩多少竝處極刑至是始革之九月庚午以大理卿劇可久爲太僕卿以左庶子張仁瑒爲大理卿以司天監趙延乂爲太府卿兼判司天監事詔北面沿邊州鎮自守疆場不得入北界俘掠乙亥鎮州奏契丹寇深冀州遣龍捷都指揮使劉誨牙內都指揮使何繼筠等率兵拒之而退時契丹聞官軍至掠冀部丁壯數百隨行狼狽而北冀部被擄者望見官軍鼓譟不已官軍不敢進其丁壯盡爲蕃軍所殺而去丁丑以鄭州防禦使白重贊爲相州畱後戊寅樂壽都

監杜延熙奏于瀛州南殺敗契丹斬首三百級獲馬四十七匹癸未帝姨母韓氏追封楚國夫人故第四姊追封福慶長公主易州奏契丹武州刺史石越來奔冬十月丙戌以前晉州節度使王彥超爲河陽節度使庚寅詔諸州罷任或朝覲竝不以器械進貢先是諸道州府各有作院每月課造軍器逐季搬送京師進納其逐州每年占畱係省錢帛不少謂之甲料仍更于部內廣配土產物徵斂數倍民甚苦之除上供軍器外節度使刺史又私造器甲以進貢爲名功費又倍悉取之于民帝以諸州器甲造作不精兼占畱屬省物用過當乃令罷

之仍選擇諸道作工赴京作坊以備役使乙未永興軍
奏宣徽北院使知軍府事翟光鄴卒丁酉葬德妃廢朝
戊戌以宣徽南院使袁義權知永興軍府事以樞密直
學士工部侍郎陳觀權知開封府事己亥升鉅野縣爲
濟州以樞密院副使鄭仁誨爲宣徽北院使兼樞密副
使庚子幸樞密院王峻請之也甲辰宰臣李穀以臂傷
未愈上表辭位凡三上章詔報不允丁未滄州奏自十
月己前蕃歸漢戶萬九千八百戶是時北境饑饉人民
轉徙襁負而歸中土者散居河北州縣凡數十萬口十
一月丙辰荆南奏朗州大將劉言以今年十月三日領

兵趨長沙十五日至潭州淮南所署湖南節度使邊鎬
岳州刺史宋德權竝棄城遁去庚申以前少府監馬從
斌爲殿中監壬戌樞密使王峻亡妻崔氏追封趙國夫
人非故事也乙丑刑部尙書張沆卒辛未陝州折從阮
移鎮邠州以前宋州節度使李洪義爲安州節度使癸
酉青州符彥卿移鎮鄆州甲戌詔曰累朝已來用兵不
息至于繕治甲冑未免配役生靈多取于民助成軍器
就中皮革尤峻科刑稍犯嚴條皆抵極典鄉縣以之生
事姦猾得以侵漁宜立新規用革前弊應天下所納牛
皮今將逐所納數三分內減二分其一分子人戶苗畝

上配定每秋夏苗共十頃納連角皮一張其黃牛納乾筋四兩水牛半斤犢子皮不在納限牛馬驢騾皮筋角今後官中更不禁斷只不得將出化外敵境州縣先置巡檢牛皮節級竝停丙子詔曰應內外文武官寮幕職州縣官舉選人等今後有父母祖父母亡歿未經遷葬者其主家之長不得輒求仕進所由司亦不得申舉解送如是卑幼在下者不在此限己卯日南至帝御崇元殿受朝賀仗衛如儀十二月丙戌權武平軍畱後劉言遣牙將張崇嗣入奏于十月十三日與節度副使王進達行軍司馬何敬貞指揮使周行逢等同共部領戰棹

攻收湖南僞節度使邊鎬當夜出奔王進逵等已入潭

州九國志王逵傳逵朗州武陵人或名進逵邊鎬爲武

安軍節度使召劉言入覲言不行謀于逵曰江南召

我不往必加兵于我矣爲之奈何逵曰鎬之此來以制

置潭朗爲名公如速行正入其算武陵負江湖之阻帶

甲百萬乃欲拱手臣異姓乎鎬新至長沙經略未定乘

人心憤怒引兵攻鎬可一鼓而擒也言然之乃遣與何

景真等同起兵于武陵號十指揮使以攻邊鎬逵率舟

師南上至長沙邊鎬大駭以所部奔歸江南諸州屯守

皆罷之盡復湖外之地癸巳太子太師致仕安叔千卒甲午詔今

後諸侯入朝不得進奉買宴丁酉皇子澶州節度使榮

落起復加同平章事戊戌太子少傅致仕王延卒壬寅

幸西莊乙巳以端明殿學士顏衍權知開封府事御史

臺奏請改左右威衛復爲左右屯衛從之避御名也是

冬無雪

廣順三年春正月壬子朔帝御崇元殿受朝賀仗衛如儀幸太平宮起居漢太后甲寅賜羣臣射于內鞠場乙卯武平軍兵馬畱後劉言奏潭州干戈之後焚燒殆盡乞移使府于武陵從之詔升朗州爲大都督府在潭州之上丙辰以武平節度使畱後檢校太尉劉言爲檢校太師同平章事行朗州大都督充武平軍節度兼三司水陸轉運等使制置武安靜江等軍事進封彭城郡公武平軍節度副使權知潭州軍州事檢校太傅王進達爲檢校太尉行潭州刺史充武安軍節度使以武安軍

行軍司馬兼衙內步軍都指揮使檢校太傅何敬貞爲
檢校太尉行桂州刺史充靜江軍節度使以張傲領眉
州刺史充武平軍節度副使以朱元琇領黃州刺史充
靜江軍節度副使以周行逢領集州刺史充武安軍節
度行軍司馬自進達而下皆劉言將校也邠州奏慶州
略蕃部野雞族略奪商旅侵擾州界詔遣寧州刺史張
建武等率兵掩襲仍先賜勅書安撫如不從命卽進軍
問罪辛酉詔賜朗州劉言應兩京及諸道舊屬湖南樓
店邸第乙丑詔諸道州府係屬戶部營田及租稅課利
等除京兆府莊宅務贍國軍權鹽務兩京行從莊外其

餘竝割屬州縣所徵租稅課利官中只管舊額其職員
節級一切停廢應有客戶元佃係省莊田桑土舍宇便
賜逐戶充爲永業仍仰縣司給與憑由應諸處元屬營
田戶部院及係縣人戶所納租中課利起今年後竝與
除放所有見牛犢竝賜本戶官中永不收係云帝在民
間素知營田之弊至是以天下係官莊田僅萬計悉以
分賜見佃戶充永業是歲出戶三萬餘百姓旣得爲己
業比戶欣然于是葺屋植樹敢致功力又東南郡邑各
有租牛課戶往因梁太祖渡淮軍士掠民牛以千萬計
梁太祖盡給與諸州民輸租課自是六十餘載時移代

改牛租猶在百姓苦之至是特與除放未幾京兆府莊宅務及權鹽務亦歸州縣依例處分或有上言以天下係官莊田甚有可惜者若遣貨之當得三十萬緡亦可資國用帝曰苟利于民與資國何異丁卯戶部侍郎權知貢舉趙上交奏諸科舉人欲等第各加封義場數進士除詩賦外別試雜文一場從之兩浙弔祭使左諫議大夫李知損責授登州司馬員外置仍令所在馳驛放遣知損銜命江浙所經藩郡皆強貸于侯伯爲青州知州張凝所奏故有是命己巳幸南莊臨水亭見雙鳧戲于池上帝引弓射之一發疊貫從臣稱賀庚午以前邠

州節度使侯章爲鄧州節度使前萊州刺史葉仁魯賜
死坐爲民所訟故也辛未詔樞密使王峻巡視河隄峻
請行故從之辛巳幸南莊閏月甲申朗州劉言潭州王
進逵奏廣賊占據桂管深入永州界俘劫遣朗州行軍
司馬何敬貞與指揮使朱全琇陳順等率水陸軍五萬
進擊丙戌回鶻遣使貢方物詔故梁租庸使趙巖姪崇
勳見居陳州量賜係官店宅從王峻之請也辛卯定州
奏契丹攻義豐軍出勁兵夜斫蕃營斬首六十級契丹
遁去甲午鎮州奏契丹寇境遣兵追襲至無極而還丙
申皇子澶州節度使榮來朝壬寅以樞密使尙書左僕

射同平章事監修國史王峻兼青州節度使餘如故延
州衙內指揮使高紹基奏言父允權患腳膝令臣權知
軍州事癸卯陳州奏吏民請與前刺史李穀立祠堂從
之時穀爲宰相聞郡人陳請遜讓數四乃止甲辰鄴都
畱守王殷加檢校太尉依前同平章事丙午鎮州節度
使何福進河陽節度使王彥超竝加檢校太尉潞州節
度使李筠加檢校太傅丁未延州節度使高允權卒己
酉開封府奏都城內錄到無名額僧尼寺院五十八所
詔廢之二月辛亥朔以前西京畱守白文珂爲太子太
師致仕進封韓國公癸丑安州節度使李洪義侍衛馬

軍都指揮使郭崇侍衛步軍都指揮使曹英竝加檢校
太尉唐州方城縣令陳守愚棄市坐剋畱戶民蠶鹽一
千五百斤入已也內制國寶兩座詔中書令馮道書寶
文其一以皇帝承天受命之寶爲文其一以皇帝神寶
爲文案傳國寶始自秦始皇令李斯篆之歷代傳授事
具前史至唐末帝自燔之際以寶隨身遂俱焚焉晉高
祖受命特製寶一座開運末契丹犯闕少帝遣其子延
煦賫送于契丹主訝其非真少帝上表具訴其事及契
丹北歸齎以入蕃漢朝二帝未暇別製至是始創爲之
庚申遣將作監李瓊知陝州軍州事甲子樞密使平盧

軍節度使尙書左僕射平章事監修國史王峻責授商州司馬員外置所在馳驛發遣戊辰左監門上將軍李建崇卒延州牙內都指揮使高紹基奏交割軍府與副使張圖已巳朗州劉言奏當道先遣行軍司馬何敬貞率兵掩擊廣賊行及潭州部衆奔潰湖南王進達以敬貞失律已梟首訖以樞密直學士工部侍郎陳觀爲祕書監壬申鳳翔少尹桑維翰授鄧州長史能晉相維翰之庶弟也坐據維翰別第爲人所訟故也癸酉以戶部侍郎知貢舉趙上交爲太子詹事是歲新進士中有李觀者不當策名物議誼然中書門下以觀所試詩賦失

韻勾落姓名故上交移官丁丑幸南莊賜從官射命容
省使向訓權知延州軍州事

舊五代史卷一百十二攷證

周太祖紀三庚申車駕發京師 案五代春秋作庚辰

帝東征歐陽史從是書作庚申

戊戌車駕至自兗州 案歐陽史作庚子至自兗州五
代春秋從是書作戊戌

節度副使王進達 王進達原本作進達後又作王達
攷九國志王達或名進達今改歸畫一

官中只管舊職 官中訛官中今據下文改正

遣兵追襲至無極而還 案契丹國志作無極山是書
無山字當係史家省文今姑仍其舊

舊五代史卷一百十二攷證

舊五代史卷一百十三

宋門下侍郎參知政事監修國史薛居正等撰

周書第四

太祖紀四

廣順三年春三月庚辰朔以相州留後白重贊爲滑州節度使以鄭州防禦使王進爲相州節度使以前兗州防禦使索萬進爲延州節度使以亳州防禦使張鐸爲同州節度使甲申以皇子澶州節度使榮爲開封尹兼功德使封晉王仍令所司擇日備禮冊命丙戌以宣徽北院使兼樞密副使鄭仁誨爲澶州節度使以殿前都

指揮使李重進領泗州防禦使以客省使向訓爲內客
省使己丑以棗州團練使王仁鎬爲右衛大將軍充宣

徽北院使兼樞密副使庚寅端明殿學士尚書兵部侍

郎顏衍落職守本官

宋史顏衍傳衍權知開封府
王峻敗罷職守兵部侍郎

以翰

林學士中書舍人王溥爲戶部侍郎充職以左司郎中

充樞密直學士景範爲左諫議大夫充職祕書監陳觀

責授左贊善大夫留司西京坐王峻黨也癸巳大風雨

土戊申幸南莊夏四月甲寅禁沿邊民戶鬻兵仗與蕃

人戊辰河中節度使王景移鎮鳳翔宋州節度使常思

移鎮青州鳳翔節度使趙暉移鎮宋州河陽節度使王

彥超移鎮河中賜朗州劉言絹三百疋以兵革之後匱乏故也詔在京諸軍將士持支救接五月己卯朔帝御崇元殿受朝賀仗衛如儀辛巳前慶州刺史郭彥欽勸歸私第國初以彥欽再刺慶州兼掌權鹽彥欽擅加權錢民夷流怨州北十五里寡婦山有蕃部曰野雞族彥欽作法擾之蕃情獷悍好爲不法彥欽乃奏野雞族掠奪綱商帝遣使齎詔撫諭望其率化蕃人旣苦彥欽貪政不時報命朝廷乃詔邠州節度使折從阮寧州刺史張建武進兵攻之建武勇于立功徑取野雞族帳擊殺數百人又殺牛族素與野雞族有憾且聞官軍討伐相

聚餉饋欣然迎奉官軍利其財貨孳畜遂劫奪之翻爲
族所誘至包山負險之地官軍不利爲蕃人迫逐投崖
墜澗而死者數百人從阮等以兵自保不相救應帝怒
彥欽及建武俱罷其任及彥欽至京師故有是命丁亥
新授青州節度使常思進在宋州日出放得絲四萬一
千四百兩請徵入官詔宋州給還人戶契券其絲不徵
甲午命中書侍郎同平章事集賢殿大學士權判門下
省事范質權監修國史六月壬子滄州奏契丹幽州權
鹽制置使兼防州刺史知盧臺軍事張藏英以本軍兵
士及職員戶人孳畜七千頭口歸化癸丑以前開封尹

楚國公侯益爲太子太師以前西京留守莒國公王守
恩爲左衛上將軍以前永興軍節度使李洪信爲左武
衛上將軍甲寅以左衛上將軍宋彥筠爲太子少師以
太子少師楊凝式爲尚書右僕射致仕癸亥前河陽節
度使王繼宏卒己巳太子太傅李懷忠卒是月河南河
北諸州大水霖雨不止川陂漲溢襄州漢水溢入城深
一丈五尺居民皆乘筏登樹羣鳥集潞州河南無鳥秋
七月戊寅朔徐州言龍出豐縣村民井中卽時澍雨漂
沒城邑癸未太子賓客馬裔孫卒甲申鄴都王殷奏乞
朝覲凡三上章允之尋以北邊奏契丹事機詔止其行

以左金吾上將軍安審信爲太子太師致仕丁亥以右金吾上將軍張從恩爲左金吾上將軍以前鄧州節度使張彥成爲右金吾上將軍己丑以虎捷左廂都指揮使永州防禦使韓通爲陝州留後庚寅太府卿判司天監趙延乂卒辛卯以前西京副留守盧價爲太子賓客乙未以御史中丞邊光範爲禮部侍郎以刑部侍郎張煦爲御史中丞以翰林學士承旨尚書禮部侍郎徐台符爲刑部侍郎充職丙申太子太師致仕安審信卒丁酉詔曰京兆鳳翔府同華邠延鄜耀等州所管州縣軍鎮頃因唐末藩鎮殊風久歷歲時未能釐革政途不一

何以教民其婚田爭訟賦稅丁徭合是令佐之職其擒
姦捕盜庇護部民合是軍鎮警察之職今後各守職分
專切提撕如所職疎遣各行按責其州府不得差監徵
軍將下縣戊戌衛尉少卿李溫美責授房州司戶參軍
溫美奉使祭海便道歸家家在壽光縣爲縣吏馮勳所
訟故黜之供奉官武懷贊棄市坐盜馬價入已也壬寅
以鴻臚少卿趙修已爲司天監八月己酉幸南莊丙辰
內衣庫使齊藏珍除名配沙門島藏珍奉詔修河不于
役所部轄私至近縣止宿及報隄防危急安寢不動遂
致橫流故有是責庚申邢州節度使劉訶移鎮河陽辛

西以龍捷左廂都指揮使閩州防禦使田景咸爲邢州
留後丁卯河決河陰京師霖雨不止給賜諸軍將士薪
芻有差癸酉以翰林學士戶部侍郎王溥爲端明殿學
士甲戌潭州王進達奏朗州劉言與淮賊通連差指揮
使鄭玠部領兵士欲併當道鄭玠爲軍衆所執奔入武
陵劉言尋爲諸軍所廢臣已至朗州安撫訖詔劉言勒
歸私第委王進達取便安置是月所在州郡奏霖雨連
綿漂沒田稼損壞城郭廬舍九月己卯太子少保盧損
卒丁酉深州上言樂壽縣兵馬都監杜延熙爲戍兵所
害先是齊州保寧郡兵士屯于樂壽都頭劉彥章等殺

延熙爲亂時鄭州開道指揮使張萬友亦屯于樂壽然
不與之同朝廷急遣供奉官馬諤省其事諤乃與萬友
擒彥章等十三人斬之餘衆奔齊州是月多陰曠木再
華冬十月戊申朔詔以來年正月一日有事于南郊諸
道州府不得以進奉南郊爲名輒有率斂已酉右金吾
上將軍張彥成卒庚戌以前同州節度使薛懷讓爲左
屯衛上將軍以尚書左丞兼判國子監田敏權判太常
卿以禮部尚書王易權兵部尚書太常奏郊廟社稷壇
位制度請下所司修奉從之以中書令馮道爲南郊大
禮使以開封尹晉王榮爲頓遞使權兵部尚書王易爲

鹵簿使御史中丞張煦爲儀仗使權判太常卿田敏爲
禮儀使以前潁州防禦使郭瓊爲權宗正卿甲寅以前
光祿卿丁知浚復爲光祿卿丙辰幸南莊西莊己未前
寧州刺史張建武責授右司禦副率以野雞族失利故
也以前翰林學士工部侍郎魚崇諒爲禮部侍郎充翰
林學士時崇諒解職于陝州就養至是再除禁職仍賜
詔召之令本州給行裝鞍馬侍親歸朝以太子賓客張
昭爲戶部尚書以太子賓客李濤爲刑部尚書詔中書
令馮道赴西京迎奉太廟神主甲子中書令馮道率百
官上尊號曰聖明文武仁德皇帝答詔不允凡三上章

允之仍俟郊禮畢施行壬申鄴都邢洛等州皆上言地震鄴都尤甚十一月辛巳廢共城稻田務任人佃蔣乙酉日南至帝不受朝賀庚寅鎮州節度使何福進奏乞朝覲三奏允之詔侍衛步軍都指揮使曹英權知鎮州軍府事癸巳以將作監李瓊爲濟州刺史壬寅詔重定天下縣邑除畿赤外其餘三千戶已上爲望縣二千戶以上爲緊縣一千戶以上爲上縣五百戶以上爲中縣不滿五百戶爲中下縣十二月戊申雨木冰是日四廟神主至西郊帝郊迎奠饗奉神主入于太廟設奠安神而退壬子前單州刺史趙鳳賜死坐爲民所訟故也甲

寅詔諸道州府縣鎮城內人戶舊請蠶鹽徵價起今後
竝停甲子鎮州節度使何福進來朝乙丑鄴都畱守王
殷來朝丙寅禮儀使奏皇帝郊廟行事請以晉王榮爲
亞獻通攝終獻行事從之己巳左補闕王伸停任坐檢
田于亳州虛憑紐配故也辛未鄴都畱守侍衛親軍都
指揮使王殷削奪在身官爵長流登州尋賜死于北郊
其家人骨肉竝不問罪癸酉帝宿齋于崇元殿爲來年
正月一日親祀南郊也時帝已不豫甲戌宿于太廟乙
亥質明帝親饗太廟自齋宮乘步輦至廟庭被袞冕令
近臣翼侍陞階止及一室行禮俛首而退餘命晉王率

有司終其禮是日車駕赴郊宮

顯德元年春正月丙子朔帝親祀圜丘禮畢詣郊宮受
賀車駕還宮御明德樓宣制大赦天下改廣順四年爲
顯德元年自正月一日昧爽已前應犯罪人常赦所不
原者咸赦除之內外將士各優給文武職官竝與加恩
內外命婦竝與進封寺監攝官七周年已上者同明經
出身今後諸寺監不得以白身署攝升朝官兩任已上
著綠十五周年與賜緋著緋十五年與賜紫州縣官會
經五度參選雖未及十六攷與授朝散大夫階年七十
已上授優散官賜緋應奉郊廟職掌人員竝與恩澤今

後不得以梁朝及清秦朝爲僞朝僞主天下帝王陵廟
及各臣墳墓無後官爲檢校云宣赦畢帝御崇元殿受
冊尊號禮畢羣臣稱賀時帝郊祀御樓受冊有司多略
其禮以帝不豫故也先是有占者言鎮星在氏房乃鄭
宋之分當京師之地兼氏宿主帝王路寢若散財以致
福遷幸以避災庶幾可以驅禳矣帝以遷幸煩費不可
輕議散財可矣故有郊禋之命洎歲暮帝疾增劇郊廟
之禮蓋勉而行之耳戊寅詔廢鄴都依舊爲天雄軍大
名府在京兆府之下庚辰制皇子開封尹晉王榮可開
府儀同三司檢校太尉兼侍中行開封尹功德使判內

外兵馬事襄州安審琦進封陳王鄆州符彥卿進封衛
王移鎮天雄軍荆南高保融進封南平王夏州李彝興
進封西平王甲申宋州趙暉進封韓國公青州常思進
封萊國公徐州王晏進封滕國公鄧州侯章進封申國
公西京武行德進封譙國公許州郭從義加檢校太師
鳳翔王景進封褒國公華州孫方諫進封蕭國公自趙
暉已下竝加開府儀同三司乙酉分命朝臣往諸州開
倉減價出糶以濟饑民詔潭州依舊爲大都督府在朗
州桂州之上丙戌以澶州節度使鄭仁誨爲樞密使加
同平章事鄜州楊信加開府儀同三司進封杞國公邠

州折從阮加開封儀同三司改封鄭國公滄州李暉加
檢校太尉安州李洪義加檢校太師貝州王饒加檢校
太尉以陳州節度使兼侍衛馬軍都指揮使郭崇爲澶
州節度使加同平章事以曹州節度使兼侍衛步軍都
指揮使曹英爲鎮州節度使加同平章事潭州王進遠
加特進兼侍中河陽劉詞加檢校太尉河中王彥超加
同平章事以鎮州節度使何福進爲鄆州節度使加同
平章事潞州李筠加同平章事戊子晉州藥元福滑州
白重贊相州王進同州張鐸竝加檢校太傅以延州節
度使索萬進爲曹州節度使加檢校太傅定州畱後孫

行友邢州畱後田景咸陝州畱後韓通靈武畱後馮繼業竝正授節度使庚寅夜東北有大星墜其聲如雷壬辰宰臣馮道加守太師范質加尚書左僕射監修國史李穀加右僕射集賢殿大學士以端明殿學士尚書戶部侍郎王溥爲中書侍郎平章事

東都事略太祖將大漸促召學士草制以

溥爲中書侍郎同中書門下平章事已宣制太祖曰吾無恨矣

司徒竇貞固進封汧國

司空蘇禹珪進封莒國公竝加開府儀同三司以宣徽南院使知永興軍府事袁義爲延州節度使以宣徽北院使兼樞密副使王仁鎬爲永興軍節度使以前安州節度使王令溫爲陳州節度使以殿前都指揮使泗

州防禦使李重進爲武信軍節度使檢校太保典軍如故以龍捷左廂都指揮使睦州防禦使樊愛能爲侍衛馬軍都指揮使洋州節度使加檢校太保以虎捷左廂都指揮使果州防禦使何徽爲侍衛步軍都指揮使利州節度使加檢校太保以樞密承旨魏仁浦爲樞密副使是日巳時帝崩于滋德殿聖壽五十一祕不發喪乙未遷神柩于萬歲殿召文武百官班于殿庭宣遺制晉王榮可于柩前卽皇帝位服紀月日一如舊制云是歲自正月朔日後景色昏晦日月多暈及嗣君卽位之日天氣晴朗中外肅然帝自郊禋後其疾乍瘳乍劇晉王

省侍不離左右

東都事略李重進周太祖之甥母卽福慶長公主重進年長于世宗及太祖寢

疾召重進受顧命令拜世宗以定君臣之分

累諭晉王曰我若不起此疾汝

卽速治山陵不得久畱殿內陵所務從儉素應緣山陵

役力人匠竝須和雇不計近遠不得差配百姓陵寢不

須用石柱費人功只以輓代之用瓦棺紙衣臨入寢之

時召近稅戶三十家爲陵戶下事前揭開瓦棺徧視過

陵內切不得傷他人命勿修下宮不要守陵宮人亦不

得用石人石獸只立一石記子鐫字云大周天子臨晏

駕與嗣帝約緣平生好儉素只令著瓦棺紙衣葬若違

此言陰靈不相助又言朕攻收河府時見李家十八帝

陵園廣費錢物人力竝遭開發汝不聞漢文帝儉素葬
在霸陵原至今見在如每年寒食無事時卽仰量事差
人灑掃如無人去只遙祭兼仰于河府魏府各葬一副
劍甲澶州葬通天冠絳紗袍東京葬一副平天冠袞龍
服千萬千萬莫忘朕言二月甲子太常卿田敏上尊謚
曰聖神恭肅文武孝皇帝廟號太祖四月乙巳葬于嵩
陵宰臣李穀撰謚冊文王溥撰哀冊文

五代史補高祖之爲樞密使也

每出入常恍然覩人前導狀若臺省人吏其服色一緋一綠高祖以爲不祥深憂之及河中鳳翔永興等處反詔命高祖征之一舉而三鎮瓦解自是權傾天下論者以爲功高不賞郭氏其危乎高祖聞而恐懼居無何忽觀前導者服色緋者改紫綠者改緋高祖心始安曰彼二人者但見其升不見其降吉兆也未幾遂爲三軍所

推戴高祖之入京師也三軍分擾殺人爭物者不可勝數時有趙童子者知書善射至防禦使覩其紛擾竊憤之乃大呼于衆中曰樞密太尉志在除君側以安國所謂兵以義舉鼠輩敢爾乃賊也豈太尉意耶于是持弓矢于所居巷口據牀坐几軍人之來侵犯者皆殺之由是居人賴以保全僅數千家其間亦有致金帛于門下用爲報答已堆集如邱陵焉童子見而笑曰吾豈求利者耶于是盡歸其主高祖聞而異之陰謂世宗曰吾聞人問讖云趙氏合當爲天子觀此人才略度量近之矣不早除去吾與汝其可保乎使人誣告收付御史府劾而誅之洎高祖厭世未十年而皇宋有天下趙氏之讖乃應于斯知王者不死信矣哉高祖征李守貞軍次河上高祖慮其爭濟臨岸而諭之未及坐忽有羣鴉噪于上高祖退十餘步引弓將射之矢未及發而岸崩其聲裂之勢在高祖足下高祖棄弓顧羣鴉而笑曰得非天使汝驚動吾耶如此則李守貞不足破矣于是三軍欣然各懷鬪志矣五代史闕文周太祖在漢隱帝朝爲樞密使將兵伐河中李守貞時馮道守太師不與朝政以請告周祖謁道于私第問伐蒲策道辭以不在其位不敢議國事周祖固問之道不得已謂周祖曰相公頗

知博乎周祖微時好蒲博屢以此抵罪疑道譏已勃然
變色道曰是行亦猶博也夫博財多者氣豪而勝財寡
者心怯而輸守貞在晉累典禁兵自謂軍情附已遂謀
反耳今相公誠能不惜官錢廣施惠愛明其賞罰使軍
心許國則守貞不足慮也周祖曰恭聞命矣故伐蒲之
役周祖以便宜從事卒成大功然亦軍旅歸心終移漢
祚又周祖自鄴起兵赴闕漢隱帝兵敗遇害于劉子陂
周祖入京師百官謁周祖見道猶設拜意道便行推戴
道受拜如平時徐曰侍中此行不易周祖氣沮故禪代
之謀稍緩及請道詣徐州冊湘陰公爲漢嗣道曰侍中
由衷乎周祖設誓道曰莫教老天爲謬語令爲謬語人
臣謹案周世宗朝詔御史臣修周祖實錄故道之事所
宜諱矣

史臣曰周太祖昔在初潛未聞多譽泊西平蒲阪北鎮
鄴臺有統御之勞顯英偉之量旋屬漢道斯季天命有
歸總虎旅以盪神京不無慙德攬龍圖而登帝位遂闡

皇風朞月而弊政皆除逾歲而羣情大服何遷善之如是蓋應變以無窮者也所以魯國兇徒望風而散井門遺孽引日偷生及鼎駕之將昇命瓦棺而薄葬勤儉之美終始可稱雖享國之非長亦開基之有裕矣然而二王之誅議者譏其不能駕馭權豪傷于猜忍卜年斯促抑有由焉

舊五代史卷一百十三

舊五代史卷一百十三攷證

周太祖紀四又殺牛族素與野雞族有憾 殺牛族原

本作殺牛于族攷通鑑五代會要宋史東都事略俱
作殺牛族知原本于字衍今刪

六月壬子滄州奏契丹幽州權鹽制置使兼防州刺史
知盧臺軍事張藏英以本軍歸化 案歐陽史作秋
七月張藏英來奔

以前西京畱守莒國公王守恩爲左衛上將軍 王守
恩原本作守思今據通鑑改正

舊五代史卷一百十三攷證

舊五代史卷一百十四

宋門下侍郎參知政事監修國史薛居正等撰

周書第五

世宗紀一

世宗睿武孝文皇帝諱榮太祖之養子蓋聖穆皇后之姪也本姓柴氏父守禮太子少保致仕

隆平集云柴翁者常獨居室人

以爲司冥事一日笑不止妻問其故不答翁嗜飲妻醉之以酒乃曰上帝有命郭郎爲天子攷柴翁卽守禮之父史佚其名帝以唐天祐十八年歲在辛巳九月二十四日

丙午生于邢州之別墅年未童冠因侍聖穆皇后在太祖左右時太祖無子家道淪落然以帝謹厚故以庶事

委之帝悉心經度費用獲濟太祖甚憐之乃養爲己子

漢初太祖以佐命功爲樞密副使帝始授左監門衛將

軍

國老談苑云周世宗在漢爲諸衛將軍嘗遊畿甸謁縣令忘其姓名令方聚邑客捕博弗得見世宗頗銜

之及卽位令因部夫犯贓數百疋宰相范質以具獄上奏世宗曰親民之官贓狀狼籍法當處死質奏曰受所監臨財物有罪上贓雖多法不至死世宗怒厲聲曰法者自古帝王之所制本以防姦朕立法殺贓吏非酷刑也質曰陛下殺之則可若付有司臣不敢署勅遂貸其命

二年太祖鎮鄴改天雄軍

牙內都指揮使領貴州刺史檢校右僕射三年冬太祖

入平內難留帝守鄴城廣順元年正月太祖踐祚帝懇

求入覲忽夢至河而不得渡尋授澶州節度使檢校太

保封太原郡侯帝在鎮爲政清肅盜不犯境先是澶之

里街湫隘公署毀圯帝卽廣其街肆增其廨宇吏民賴

之

宋史王贊傳周世宗鎮澶淵每旬決囚贊引律

二年

令辨析中理問之知其嘗事學問卽署右職

正月兗州慕容彥超反帝累表請征行太祖嘉之及曹
英等東討數月無功太祖欲親征名羣臣議其事宰臣
馮道奏以方當盛夏車駕不宜衝冒太祖曰寇不可翫
如朕不可行當使澶州兒子擊賊方辦吾事時樞密王
峻意不欲帝將兵故太祖親征六月兗州平十二月加
檢校太傅同平章事三年正月帝入觀三月授開封尹
兼功德使封晉王顯德元年正月庚辰加開府儀同三
司檢校太尉兼侍中依前開封尹兼功德使判內外兵

馬事時太祖寢疾彌留士庶憂沮及聞帝總內外兵柄

咸以爲愜

隆平集曹翰隸世宗幕下世宗鎮澶淵以爲牙校及尹開封翰猶在澶淵聞周祖寢疾不

俟名來見世宗密言曰王爲冢嗣不侍醫藥何以副天下望世宗悟入侍禁中以府事命翰總決壬辰

太祖崩秘不發喪丙申內出太祖遺制晉王榮可於柩

前卽位羣臣奉帝卽皇帝位庚子宰臣馮道率百僚上

表請聽政凡三上壬寅帝見羣臣於萬歲殿門之東廡

下二月庚戌潞州奏河東劉崇與契丹大將軍楊衮舉

兵南指壬戌宰臣馮道率百僚上表請御殿凡三上允

之丁卯以中書令馮道充山陵使太常卿田敏充禮儀

使兵部尚書張昭充鹵簿使御史中丞張煦充儀仗使

開封少尹權判府事王敏充橋道使河東賊將張暉率
前鋒自團柏谷入寇帝召羣臣議親征宰臣馮道等奏
以劉崇自平陽奔遁之後勢弱氣奪未有復振之理竊
慮聲言自來以誤于我陛下纂嗣之初先帝山陵有日
人心易搖不宜輕舉命將禦寇深以爲便帝曰劉崇幸
我大喪聞我新立自謂良便必發狂謀謂天下可取謂
神器可圖此際必來斷無疑耳馮道等以帝銳于親征
因固諍之帝曰昔唐太宗之創業靡不親征朕何憚焉
道曰陛下未可便學太宗帝又曰劉崇烏合之衆苟遇
王師必如山壓卵耳道曰不知陛下作得山否帝不悅

而罷名諸道募山林亡命之徒有勇力者送于闕下仍
目之爲強人帝以趨捷勇猛之士多出于羣盜中故令
所在招納有應命者卽貸其罪以禁衛處之至有朝行
殺奪暮升軍籍讎人遇之不敢仰視帝意亦患之其後
頗有不獲宥者三月丁丑潞州奏河東劉崇入寇兵馬
監押穆令均部下兵士爲賊軍所襲官軍不利詔天雄
軍節度使符彥卿領兵自磁州固鎮路赴潞州以澶州
節度使郭崇副之詔河中節度使王彥超領兵取晉州
路東向邀擊以陝府節度使韓通爲副命宣徽使向訓
馬軍都指揮使樊愛能步軍都指揮使何徽滑州節度

使白重贊鄭州防禦使史彥超前耀州團練使符彥能等領兵先赴澤州辛巳制大赦天下常赦所不原者咸赦除之諸貶降責授官量與升陟敘用應配流徒役人並放逐便諸道州府所欠去年夏秋租稅並放內外見任前文武職官並與加恩父母在者並與恩澤亡沒者與封贈其母妻未敘者特與敘封云前涇州節度使史匡懿卒癸未詔以劉崇入寇車駕取今月十一日親征甲申以樞密使鄭仁誨爲東京留守乙酉車駕發京師壬辰至澤州癸巳王師與河東劉崇契丹楊衮大戰于高平賊軍敗績初車駕行次河陽聞劉崇自潞而南卽

倍程而進是月十八日至澤州旣晡帝御戎服觀兵于東北郊距州十五里夜宿于村舍十九日先鋒與賊軍相遇賊陣于高平縣南之高原有賊中來者云劉崇自將騎二萬并契丹萬餘騎嚴陣以待官軍帝促兵以擊之崇東西列陣頗亦嚴整乃令侍衛馬步軍都虞候李重進滑州節度使白重贊將左居陣之西廂侍衛馬軍都指揮使樊愛能步軍都指揮使何徽將右居陣之東廂宣徽使向訓鄭州防禦使史彥超以精騎當其中殿前都指揮使張永德以禁兵衛蹕帝介馬觀戰兩軍交鋒未幾樊愛能何徽望賊而遁東廂騎軍亂步軍解甲

投賊帝乃自率親騎臨陣督戰

隆平集馬仁瑀傳從世宗親征劉崇王師不利

仁瑀謂衆曰主辱臣死因躍馬大呼引弓連斃將卒數十士氣始振

今上馳騎于陣前先

犯其鋒戰士皆奮命爭先賊軍大敗日暮賊萬餘人阻澗而陣會劉詞領兵至與大軍追之賊軍又潰臨陣斬賊大將張暉及偽樞密使王延嗣諸將分兵追襲殪尸棄甲填滿山谷初夜官軍至高平降賊軍數千人所獲輜重兵器駝馬偽乘輿器服等不可勝紀其夕殺降軍二千餘人我軍之降敵者亦皆就戮初兩軍之未整也風自東北起不便于我及與賊軍相遇風勢陡迴人情相悅戰之前夕有大星如日流行數丈墜于賊營之上

及戰北人望見官軍之上有雲氣如龍虎之狀則天之助順亶其然乎是日危急之勢頃刻莫保賴帝英武果敢親臨寇敵不然則社稷幾若綴旒矣是夕帝宿于野次甲午次高平縣詔賜河東降軍二千餘人各絹二匹并給其衣裝鄉兵各給絹一匹放還本部是日大雨戊戌車駕至潞州河南府上言前青州節度使常思卒己亥侍衛馬軍都指揮使夔州節度使樊愛能侍衛步軍都指揮使壽州節度使何徽等并諸將校七十餘人竝伏誅高平之役兩軍旣成列賊騎來挑戰愛能望風而退何徽以徒兵陣于後爲奔騎所突卽時潰亂二將南

走帝遣近臣宣諭止遏莫肯從命皆揚言曰官軍大敗
餘衆已解甲矣至暮以官軍克捷方稍稍而迴帝至潞
州錄其奔遁者自軍使以上及監押使臣竝斬之由是
驕將墮兵無不知懼帝以何徽有平陽守禦之功欲貸

其罪竟不可與愛能俱殺之皆給槥車歸葬

東都事略
世宗謂張

永德曰樊愛能及偏裨七十餘人吾欲盡按軍法何如
對曰必欲開拓疆宇威加四海安可已也世宗善其言
悉誅愛能等以
徇軍聲始振 庚子以侍衛馬步都虞候李重進爲許

州節度使以宣徽南院使向訓爲滑州節度使以殿前
都指揮使張永德爲武信軍節度使職竝如故以滑州
節度使白重贊爲鄆州節度使以鄭州防禦使史彥超

爲華州節度使賞高平之功也以晉州節度使藥元福爲同州節度使以宣徽北院使楊廷璋爲晉州節度使以同州節度使張鐸爲彰義軍節度使以客省使吳廷祚爲宣徽北院使以龍捷左廂都指揮使李千爲蔡州防禦使以龍捷右廂都指揮使田中爲密州防禦使以虎捷右廂都指揮使張順爲登州防禦使以龍捷左第二軍都指揮使孫延進爲鄭州防禦使以前耀州團練使符彥能爲澤州防禦使以散員都指揮使李繼勳爲殿前都虞候以殿前都虞候韓令坤爲龍捷左廂都指揮使以鐵騎第一軍都指揮使趙宏殷爲龍捷右廂都

指揮使以散員都指揮使慕容延釗爲虎捷左廂都指揮使以控鶴第一軍都指揮使趙鼎爲虎捷右廂都指揮使並遙授團練使其餘改轉有差壬寅以天雄軍節度使衛王符彥卿爲河東行營都部署知太原行府事以澶州節度使郭崇爲行營副部署以宣徽南院使向訓爲行營兵馬都監以待衛都虞候李重進爲行營都虞候以華州節度使史彥超爲先鋒都指揮使領步騎二萬進討河東詔河中節度使王彥超陝府節度使韓鐸率兵自陰地關討賊以河陽節度使劉詞爲隨駕都部署以鄜州節度使白重贊爲隨駕副部署夏四月乙

巳太祖靈駕發東京乙卯葬于嵩陵河中節度使王彥

超奏偽汾州防禦使董希顏以城歸順

宋史王彥超傳彥超自陰地關

與符彥卿會兵圍汾州諸將請急攻彥超曰城已危矣
旦暮將降我士卒精銳驅以先登必死傷者衆少待之

翼日州將董

希顏果降

丙辰偽遼州刺史張漢超以城歸順丁巳

幸柏谷寺遣右僕射平章事判三司李穀赴河東城下

計度軍儲詔河東城下諸將招撫戶口禁止侵掠只令

徵納當年租稅及募民入粟五百斛草五百圍者賜出

身千斛千圍者授州縣官辛酉符彥卿奏嵐憲二州歸

順壬戌制立衛國夫人符氏爲皇后仍令有司擇日備

禮冊命王彥超奏收下石州獲偽刺史安彥進

宋史王彥超傳

引兵趣石州彥超親鼓士乘城躬冒矢石數日下之擒其守將安彥進獻行在癸亥僞沁州刺

史李廷誨以城歸順甲子皇妹壽安公主張氏進封晉

國長公主乙丑東京奏太師中書令馮道薨丙寅太祖

皇帝神主耐于太廟庚午曲赦潞州見禁罪人除死罪

外竝釋放是日車駕發潞州親征劉崇癸酉忻州僞監

軍李勅殺其刺史趙阜及契丹所遣大將楊努瑚以州

城歸順詔授李勅忻州刺史五月乙亥以尚書右丞邊

歸讜守本官充樞密直學士以尚書戶部侍郎陶穀守

本官充翰林學士宋史陶穀傳從征太原時魚崇諒迎母後至穀乘間言曰崇諒宿畱不來

有願望意世宗頗疑之崇諒又表陳母病詔許歸陝州就養以穀爲翰林學士丙子車駕至太

原城下是日僞代州防禦使鄭處謙以城歸順丁丑觀
兵于太原城下帝親自慰勉錫賚有差升代州爲節鎮
以靜塞軍爲額以鄭處謙爲節度使戊寅斬僞命石州
刺史安彥進于太原城下以其拒王師也庚辰以前忠
武軍節度使郭從義爲天平軍節度使遣符彥卿郭從

義向訓白重贊史彥超等率步騎萬餘赴忻州

宋史符彥卿傳

彥卿之行也世宗以并人雖敗朝廷饋運不繼未議攻
擊且令觀兵城下徐圖進取及周師入境汾晉吏民望
風歛接皆以久罹虐政願輸軍需以資兵力世宗從之
而連下數州彥卿等皆以芻糧未備欲旋軍世宗不之
省乃調山東近郡饒軍食濟之是夜大風發屋拔樹壬午以宰臣李穀

判太原行府事辛丑升府州爲節鎮以永安軍爲軍額

以本州防禦使折德辰爲節度使六月癸卯朔詔班師

車駕發離太原時大集兵賦及徵山東懷孟蒲陝丁夫

數萬急攻其城旦夕之間期于必取會大雨時行軍士

勞苦復以忻口之師不振帝遂決旋師之意指麾之間

頗傷匆遽部伍紛亂無復嚴整不逞之徒訛言相恐隨

軍資用頗有遺失者賊城之下糧草數十萬悉焚棄之

通鑑攷異引晉陽見聞錄六月旦周師南轅返旆惟數

百騎間之以步卒千人長槍赤甲銜趨捷跳梁于城隅

晡晚殺行而抽退宋史藥元福傳詔令班師元福上言

曰進軍甚易退軍甚難世宗曰一以委卿遂部分卒伍
爲方陣而南元福以麾下爲後
乙巳車駕至潞州癸丑
殿崇果出兵來追元福擊走之
帝發潞州乙丑幸新鄭縣丙寅帝親拜高陵祭奠而退

賜守陵將吏及近陵戶帛有差

五代會要顯德元年二月車駕征太原回親拜

嵩陵望陵號慟至陵所俯伏哀泣感于左右再拜訖祭奠而退

庚午帝至自河東秋七

月癸酉朔前河西軍節度使申師厚責授右監門衛率府副率師厚在涼州歲餘以所部艱食蕃情反覆奏乞入朝尋留其子爲畱後不俟詔離任故責之乙亥天雄軍節度使衛王符彥卿進位守太傅改封魏王鄆州郭從義加兼中書令河陽劉詞移鎮永興軍加兼侍中許州李筠加兼侍中河中王彥超移鎮許州加兼侍中許州節度侍衛都虞候李重進移鎮宋州加同平章事兼侍衛親軍都指揮使以信武軍節度使兼殿前都指揮

使張承德爲滑州節度使加檢校太傅典軍如故同州
藥元福移鎮陝州加檢校太尉鄜州白重贊移鎮河陽
加檢校太尉陝州韓通移鎮曹州加檢校太傅帝卽位
之初覃慶于諸侯是賞從征之功也丙子以前禮部侍
郎邊光範爲刑部侍郎權判開封府事丁丑天下兵馬
元帥吳越國王錢俶加天下兵馬都元帥襄州節度使
陳王安審琦加守太尉戊寅右散騎常侍張可復卒以
前亳州防禦使李萬金爲鄜州留後庚辰幸南莊辛巳
荆南節度使南平王高保融加守中書令夏州節度使
西平王李彝興加守太保西京留守武行德徐州王晏

鄧州侯章竝加兼中書令癸未湖南王進達加兼中書
令天德軍節度使郭勳邠州折從阮安州李洪義竝加
兼侍中以前華州節度使孫方諫爲同州節度使加兼
中書令以前永興軍節度使王仁鎬爲河中節度使加
檢校太尉乙酉滄州李暉貝州王饒鎮州曹英竝加兼
侍中涇州張鐸相州王進延州袁義竝加檢校太尉壬
辰百寮上表請以九月二十四日誕聖日爲天清節從
之癸巳以左僕射兼門下侍郎平章事監修國史范質
爲守司徒兼門下侍郎平章事宏文館大學士

國老談苑云周

太祖嘗令世宗詣范質時爲親王軒車高大門不能容
世宗卽下馬步入及嗣位從容語質曰卿所居舊宅耶

門樓一何小以左僕射兼中書侍郎平章事集賢殿大
哉因爲治第

學士判三司李穀爲守司徒兼門下侍郎平章事監修

國史以中書侍郎平章事王溥爲中書侍郎兼禮部尚

書平章事集賢殿大學士以樞密院學士工部侍郎景

範爲中書侍郎平章事判三司樞密使檢校太保同平

章事鄭仁誨加兼侍中靈武馮繼業定州孫行友邢州

田景威竝加檢校太傅晉州楊廷璋加檢校太保以太

子詹事趙上交爲太子賓客乙未以樞密副使右監門

衛大將軍魏仁浦爲樞密使檢校太保

東都事略云議者以仁浦不由

科第進世宗曰顧才何如耳遂用之丙申以中書舍人史館修撰判館事

劉溫叟爲禮部侍郎判館如故丁酉相州節度使王進
卒八月壬申朔以宣徽北院使吳延祚爲右監門衛大
將軍充職以樞密院直學士尚書右丞邊歸謹爲尚書
左丞充職甲辰幸南莊賜從臣射乙巳以吏部侍郎顏
衍爲工部尚書致仕丙午同州節度使孫方諫卒己酉
前澤州刺史李彥崇責授右司禦副率高平之役帝與
賊軍相遇卽令彥崇領兵守江猪嶺以遏寇之歸路彥
崇初見王師已却卽時而退及劉崇兵敗果由茲嶺而
遁故有是責壬子以金州防禦使王暉爲同州畱後癸
丑以吳越國內外都指揮使吳延福爲寧國軍節度使

檢校太尉從錢俶之請也以太子少師宋彥筠爲太子太師致仕甲寅以兵部郎中兼太常博士尹拙爲國子祭酒丙辰皇姑故福慶長公主追封燕國大長公主李從進之母也丁巳以戶部郎中致仕景初爲太僕卿致仕宰臣範之父也己巳詔停華州鎮國軍依舊爲郡庚午以給事中劉悅康澄竝爲右散騎常侍辛未以左散騎常侍裴巽爲御史中丞以御史中丞張煦爲兵部侍郎集賢殿學士判院事司徒詡爲吏部侍郎以左散騎常侍薛沖又爲工部侍郎九月壬申朔以東京舊宅爲皇建禪院甲戌以武安軍節度副使知潭州軍府事周

行逢爲鄂州節度使知潭州軍府事加檢校太尉丙戌
右屯衛將軍薛訓除名流沙門島坐監雍兵倉縱吏卒
陪斂也已亥以右僕射致仕韓昭允左僕射致仕楊凝
式竝爲太子太保致仕以太子太傅致仕李肅爲太子
太師致仕辛丑斬宋州巡檢供奉官副都知竹奉璘于
寧陵縣坐盜掠商船不捕獲也冬十月甲辰左羽林大
將軍孟漢卿賜死坐監納厚取耗餘也丙午以安州節
度使李洪義爲青州節度使以貝州節度使王饒爲相
州節度使以徐州節度使王晏爲西京留守以西京留
守武行德爲徐州節度使戊申以龍捷左廂都指揮使

泗州防禦使韓令坤爲洋州節度使充侍衛馬軍都指揮使以虎捷右廂都指揮使永州防禦使李繼勳爲利州節度使充侍衛步軍都指揮使已酉太子太保致仕楊凝式卒詔安貝二州依舊爲防禦州其軍額竝停壬子以今上爲永州防禦使依前殿前都虞候戊午監修國史李穀等上言曰竊以自古王者咸建史官君臣獻替之謀皆須備載家國安危之道得以直書歷代已來其名不一人君言動則起居注創于累朝輔相經綸則時政記興于前代然後採其事實編作史書蓋緣聞見之間須有來處記錄之際得以審詳今之左右起居郎

卽古之左右史也唐文宗朝命其官執筆立于殿階螭頭之下以紀政事後則明宗朝命端明殿及樞密直學士皆輪修日歷旋送史官以備纂修及近朝此事皆廢史官惟憑百司報狀館司但取兩省制書此外雖有訪聞例非端的伏自先皇帝創開昌運及皇帝陛下纘嗣丕基其聖德武功神謀睿略而皆萬幾宥密丹禁深嚴非外臣之所知豈庶僚之可訪此後欲望以諮詢之事裁制之規別命近臣旋具抄錄每當修撰日歷卽令封付史臣庶國事無漏略之文職業免踈遺之咎從之因命樞密直學士起今後于樞密使處逐月抄錄事件送

付史館已未供奉官郝光庭棄市坐在葉縣巡檢日挾私斷殺平人也是日大閱帝親臨之帝自高平之役觀諸軍未甚嚴整遂有退却至是命今上一概簡閱選武藝超絕者署爲殿前諸班因是有散員散指揮使內殿直散都頭鐵騎控鶴之號復命總戎者自龍捷虎捷以降一一選之老弱羸小者去之諸軍士伍無不精當由是兵甲之盛近代無比且減冗食之費焉

五代會要顯德元年上謂

侍臣曰侍衛兵士老少相半強懦不分蓋徇人情不能選練今春朕在高平與劉崇及蕃軍相遇臨敵有指使不前者苟非朕親當堅陣幾至喪敗况百戶農夫未能贍一甲士且兵在精不在衆宜令一點選精銳者升在上軍怯懦者任從安便庶期可用又不虛費先是上按于高平觀其退縮慨然有懲革之志又以驍勇之士

多爲外諸侯所占如是名募天下豪傑不以草澤爲阻
在于闕下躬親試閱選武藝超絕及有身首者分署爲

殿前

諸班十一月戊寅以太子賓客石光贊爲兵部尚書致

仕壬午鎮州節度使曹英卒乙酉以澶州節度使郭崇
爲鎮州節度使乙未以荆南節度副使歸州刺史高保
勗爲寧江軍節度使檢校太尉充荆南節度行軍司馬
戊戌詔宰臣李穀監築河隄先是鄆州界河決數州之
地洪流爲患故命穀治之役丁夫六萬人三十日而罷
十二月己酉太子太師侯益以本官致仕

舊五代史卷一百十四攷證

周世宗紀一賊軍又潰臨陣斬賊大將張暉 案九國

志作張元徽乘勝復入馬倒爲周師所擒殺之與是書異通鑑從是書

戊戌車駕至潞州 案歐陽史作丁酉幸潞州與是書異通鑑從歐陽史五代春秋作丙戌誤

鐵騎第一軍都指揮使趙宏殷 案原本注宣祖廟諱四字今據宋史改作宏殷

僞代州防禦使鄭處謙以城歸順 案遼史穆宗紀四年五月乙亥忻代二州叛據是書則忻州歸順在四

月代州歸順在五月丙子與遼史日月互異

努瑚舊作耨姑今改

舊五代史卷一百十四攷證